

四庫全書

史部

欽定四庫全書

大事記續編卷三十八

明 王禕 撰

宋太宗明皇帝泰始三年春正月癸巳魏都督諸軍

尉元大破張永等於呂梁東遂取淮北及豫州淮西之

地以魏紀及呂祖謙標目修

解題曰按通鑑考異索虜傳曰永攸之敗退虜攻青

冀二州執文秀道固又下書曰淮北三州民自天安

二年正月三十日壬寅昧爽已前罪一切原免按青

州破在五年淮北三州蓋徐司豫壬寅二十日壬子
三十日也

閏月宋青州刺史沈文秀冀州刺史崔道固降魏二月
復降宋三月魏征南大將軍慕容白曜督諸軍攻之

以通

鑑修秋八月壬寅宋遣中領軍沈攸之攻彭城魏拒之攸
之敗走魏取下邳宿豫淮陽碭陽

以通鑑修

解題曰按宋州郡志淮陽郡屬徐州宿豫屬淮陽碭
陽屬青州齊郡

戊申魏改元

以魏紀修

解題曰通鑑不載闕也

魏馮太后還政

以呂祖謙標目修

冬十二月常珍奇降宋

以通鑑修

時宋斷內外百官俸

以呂祖謙標目修

宋太宗明皇帝泰始四年

春正月魏攻宋豫州刺史

劉劬破之

以通鑑修

魏尉元都督徐南北兗三州軍事徐州

刺史

以通鑑修

解題曰按魏書地形志南北兗州宋治瑕邱魏領秦

山宋襲慶府魯襲慶府高平襲慶府單濟二州之地任城濟州之地

東平東平襲慶二府濮州之地東陽平後省郡六既有南兖州則兖

州爲北兖州矣

二月崔道固降魏以呂祖謙標目修宋交州人李長仁據州反

以呂祖謙標目修夏四月丙子朔日有食之通鑑目錄已卯宋減郡

縣田租之半以本紀修

解題曰王容曰宋自孝建以來用度奢侈安得有蠲賦減租之事宋書廢帝紀永光元年二月減州郡縣

田租之半謂州郡縣官公田及奉祿也明帝泰始三年復郡縣公田故今年又減其租入之半然則田租乃廢帝紀所書田祿也通鑑偶不書減田祿復公田二事故難稽其端緒爾

秋七月庚申宋以驍騎將軍蕭道成爲南兗州刺史

以本

紀修冬十月癸酉朔日有食之

以本紀修

十一月李長仁降宋

以通鑑修宋將軍阮佃夫中書通事舍人王道隆員外散騎

侍郎楊運長預政

以呂祖謙標目修

解題曰按齊書倖臣傳晉令中書舍人九品江左置
通事郎管司詔誥其後郎爲侍郎而舍人亦稱通事
宋孝武以來士庶雜選明帝世專爲佞倖矣齊初關
讞表啓發署詔勅侍郎之局復見侵矣建武世詔令
殆不關中書專出舍人省內舍人四人所置四省其
下有主書令史人數無員莫非左右要密天下文簿
版籍入副其省萬機嚴祕有如尚書

宋太宗明皇帝泰始五年春正月乙丑魏執沈文秀
魏顯祖獻丈皇帝皇興三年

青冀盡入於魏

以呂祖謙
標目修

解題曰通典魏自太武以後漸更強盛宋明以後及于齊梁國土漸蹙自守不暇雖時有侵掠而退不旋踵故魏之城鎮少被攻圍

二月己卯魏上黨公慕容白曜都督青齊東徐三州軍

事開府青州刺史封濟南王

以魏紀修

魏立輸租法除雜調

以通鑑修

夏五月魏立僧祇佛圖戶

以通鑑修

解題曰沙門統曇曜奏平齊戶及諸民有能歲輸穀

六十斛入僧曹者即爲僧祇戶粟爲僧祇粟至於儉
歲賑給饑民又請民犯重罪及官奴以爲佛圖戶以
供諸寺掃洒歲兼營田輸粟並許之於是僧祇戶粟
及寺戶徧於州鎮矣朱黼曰先王度地而授民料民
以制食因口之多寡而賦之地故有夫井之定數因
歲之登耗而給之食故有鬴鍾之定法惟其品節劑
量於細微之中故地無曠土民無失業自佛教入中
國民之游惰者盡歸沙門於是天下多不畊之人自

魏顯祖聽民入粟爲僧祇戶於是天下有不耕之地
聽民之犯罪者得入爲浮屠戶於是天下有不得役
使之人然曇曜始初輸粟之請猶以遇凶歲即以賑
給今雖凶歉不得而用也始初洒掃之請猶以民有
重罪及沒入官奴者今雖平民不得而止也流弊日
甚可勝歎哉

六月魏立子宏爲皇太子

以魏紀修

宋殺車騎將軍開府南

豫州刺史廬江王禧

以魏紀修

冬十月丁卯朔日有食之

以本

紀十一月丁未魏復修好於宋以通鑑修十二月戊戌宋建

安王休仁解揚州刺史

以呂祖謙標目修

宋置三巴校尉

以呂祖謙

標目修

宋太宗明皇帝泰始六年春正月乙亥宋制歲祀明

魏顯宗獻文皇帝皇興四年

以本紀修

夏六月癸卯宋以鎮南將軍江州刺

史王景文為左僕射揚州刺史

以本紀修

秋九月柔然侵魏

魏伐柔然大敗之

以魏紀修

冬十月魏殺慕容白曜

以魏紀修

宋太宗明皇帝泰始七年春二月戊戌宋分交

魏高祖孝文帝拓跋宏延興元年

廣州置越州

以呂祖謙
標目修

解題曰按州郡志越州分交之合浦

屬廉欽宜邕林
容高雷瓊

南寧萬安
吉陽等州

宋壽

屬欽
州

廣之臨漳

屬廉
州

又新立百梁壠

蘇永寧安昌

屬廉
州

富昌南流

屬容鬱
林二州

六郡

甲寅宋殺驃騎大將軍南徐州刺史晉平王休祐

以呂
祖謙

標目
修

夏五月戊午宋殺太尉領司徒建安王休仁

以呂
祖謙

標目
修

解題曰休仁爲計誅鉅孝武諸子至無遺育終亦不

能自免而已矣事見通鑑

庚午宋以右僕射袁粲爲尚書令吏部尚書褚淵爲左

僕射

以本紀修

宋殺太子屯騎校尉壽寂之

以呂祖謙標目修

秋七

月乙丑宋殺車騎大將軍江州刺史巴陵王休若以驃

騎大將軍桂陽王休範爲江州刺史

以呂祖謙標目修

宋殺前

督豫州軍事吳喜

以呂祖謙標目修

宋徵蕭道成爲散騎常侍

以通鑑修八月丙午魏太子宏即皇帝位改元丁未尊魏主

爲太上皇帝總大政

以呂祖謙標目修

宋太宗明皇帝泰豫元年
魏高祖孝文帝延興二年春正月甲寅朔宋改元

以本紀修

一月巳丑宋殺中書監揚州刺史王景文

以本紀修

解題曰蘇軾曰明帝答景文詔曰有心於避禍不若無心於任運千仞之木既摧於斤斧一寸之草亦悴於踐蹋晉將軍畢萬七戰皆獲死於牖下蜀將費禕從容坐談斃於刺客故甘心於履危未必逢禍縱意於處安未必全福此言近於達者然明帝竟殺景文哀哉景文之死也手敕曰與卿周旋欲全卿門戶故

有此處分敕至景文與客棊棊竟歛子納奩畢徐曰
有詔見賜以死酒至未飲門生焦度在側發酒覆地

曰大丈夫安能坐受死州中文武足以一奮景文曰

知卿至心若見念者爲我百口計乃作墨啓答敕致

謝死生亦大矣而景文安之豈貪權竊國者乎明帝

可謂不知人矣餘見通鑑

明帝殺壽寂之吳喜王景文而不能殺蕭道成休仁

休若兄弟勤戮畧盡而不慮及休
範天下事豈智術之所能盡哉

夏四月己亥宋袁粲及護軍將軍褚淵右僕射劉劭荆

州刺史蔡興宗郢州刺史沈攸之受顧命淵薦蕭道成爲右衛將軍共掌機事宋主殂庚子太子昱即皇帝位

乙巳以安成王準爲揚州刺史

以呂祖謙
標目修

解題曰道成之自南充被徵也嘗以兵動虜遠巡而不至矣及在北充被徵也又嘗有骨肉相殘禍難將興方與卿等戮力之言矣使淵而不知是不智也知

而薦之是不忠也天方厭劉氏厚其毒而降之罰於

淵何尤哉事見通鑑

按齊書褚淵傳淵爲丹陽與從弟炤同載出道達太祖淵謂炤

曰此非常人也出爲吳興太祖餉物別淵又謂人曰
此人材貌非常將來不可測也及顧命之際引太祖
豫焉

六月乙巳宋尊皇后曰皇太后立妃江氏爲皇后以本紀修

秋閏七月甲辰宋鎮西將軍沈攸之都督荆湘梁寧等

八州軍事荊州刺史以呂祖謙標目修

解題曰按州郡志寧州領建寧宋黔叙二州長寧晉

寧叙州姚州之地牂柯黔珍靖三州及南平軍平蠻思黔珍三州夜郎黔施

四州南平軍朱提叙州長南廣叙州未詳西平萬州西河陽

州雋東河陽姚州雲南叙州興寧叙州古黔梁雋

水叙黔郡十五

八月戊午宋開府樂安宣穆公蔡興宗卒以呂祖謙冬

十一月魏上皇擊柔然以魏已亥宋平西將軍郢州刺

史劉秉爲左僕射以呂祖謙宋中書通事舍人阮佃夫

加給事中輔國將軍以列傳魏詔非天地宗廟社稷勿用

牲以通鑑修

宋蒼梧王劉昱元徽元年春正月戊寅朔宋改元以本

魏高祖孝文帝延興三年紀修

次定四庫全書

大事記精編

九

二月吐谷渾寇魏夏四月戊申魏伐之

以魏紀修

秋七月魏

詔河南六州戶收絹一匹綿一斤租三十石

以魏紀修

八月

吐谷渾降魏

以魏紀修

冬十月武都王楊僧嗣卒從弟文度

自立降魏

以通鑑修

十一月宋袁粲罷固辭起復

以魏紀修

十二

月癸卯朔日有食之

以本紀修

宋蒼梧王元徽二年

魏高祖孝文帝延興四年

夏五月壬午宋太尉桂陽王

休範反平南將軍蕭道成屯新亭壬辰休範攻之死其

將攻朱雀桁鎮軍將軍劉劭死之東府陷丙申始平六

六月庚子以道成爲中領軍鎮南將軍南兖州刺史

以呂

祖謙標
目修

解題曰道成振旅凱入百姓緣道聚觀曰全國家者此公也以道成爲中領軍賞其功也道成之得兵權始於此而篡宋之基亦始於此餘見通鑑南朝宮苑記朱雀門吳所立名大航門南臨淮水北直對宣陽門去臺城可七里晉咸和中改朱雀門

褚淵傳載道成辭領軍啓

甚力彼其初猶有所
退託未敢逕居之也

郢州刺史晉熙王燮克尋陽

以本紀修

魏罷門房之誅

以呂祖謙

標目魏不赦

以呂祖謙標目修

宋蒼梧王元徽三年魏高祖孝文帝延興五年

春三月宋以車騎將軍張敬

兒都督雍梁州軍事雍州刺史

以呂祖謙標目修

秋七月宋以

開府衛將軍袁粲為中書監開府領司徒中軍將軍褚

淵為尚書令

以本紀修

八月魏置河東鹽官

以食貨志修

解題曰按魏書食貨志河東郡鹽池舊立官司以收

稅利是時罷之而民有富强者專擅其用貧弱者不

得資益延興末復立監司量其貴賤節其賦入公私兼利世宗即位政存寬簡復罷其禁與百姓共之其國利所須別爲條制取足而已自後豪貴之家復乘勢占奪近池之民又輒障吝強弱相陵神龜初太師高陽王雍太傅清河王懌等奏統池之民尉保光等擅自障禁取與自由貴賤任口請依先朝之詔禁之爲便於是復置監官以監檢焉其後更罷更立以至於永熙

宋蒼梧王元徽四年夏六月辛未魏皇太后馮氏

魏高祖孝文帝承明元年乙亥宋以左僕射劉秉

以呂祖謙
標目修

弒太上皇壬申改元戊寅魏尊皇太

以呂祖謙
標目修

后曰太皇太后臨朝稱制諡太上皇獻文皇帝

以魏
紀修

七月戊子宋征北將軍南徐州刺史建平王景素起兵

乙未敗死

以呂祖謙
標目修

宋順皇帝劉準昇明元年春正月乙酉朔魏改元

以魏
紀修

魏高祖孝文帝太和元年解題曰太和本魏明帝石勒晉海西公李勢年號

夏四月宋南豫州刺史阮佃夫等謀廢立甲戌伏誅

紀以

傳秋七月戊子宋蕭道成弒其主追廢爲蒼梧王壬辰

安成王準即皇帝位改元

以呂祖謙
標目修

甲午宋蕭道成鎮

東府丙申自爲錄尚書事袁粲爲中書監褚淵開府劉
秉遷尚書令加中領軍加沈攸之車騎大將軍開府八

月癸亥粲鎮石頭

以通鑑呂祖
謙標目修

解題曰按齊書列傳高祖坐東府高樓紀僧真侍側
上曰諸將勸我誅袁劉我意不欲便耳袁劉在道成

掌握中久矣事見通鑑

丙子魏詔工商皂隸有役者止本部丞

以本紀修

九月乙酉

魏定律令

以本紀修

冬十月楊文度取仇池十二月魏擊走

之

以本紀修

宋沈攸之舉兵討蕭道成

以呂祖謙標目修

壬申宋袁

粲劉秉謀誅蕭道成不克死之

以呂祖謙標目修

解題曰按列傳粲與蕭道成褚淵劉秉入直平決萬

機時謂之四貴粲閑默寡言不肯當事主書每往諮

決或高詠對之時立一意則衆莫能改好飲酒善吟

諷獨酌園庭以此自適居負南郭門無雜客及受遣
當權四方輻湊閒居高卧一無所接順帝即位遷中
書監司徒侍中如故時道成居東府使粲鎮石頭粲
自以身受顧託不欲事二姓密有異圖丹陽尹劉秉
宋代宗室前湘州刺史王蘊太后兄子素好武事並
慮不見容於道成皆與粲相結將帥黃回任候伯孫
曇瓘王宜興彭文之卜伯興等並與粲合餘見通鑑
王師古曰沈攸之之討道成以爲少帝昏狂宜與諸

公密議共白太后下令廢之柰何交結左右親行弒
逆其言當矣蓋人臣弒逆之罪夫人皆得以討之况
受遺之大臣乎方道成召袁粲劉秉入議其心猶有
所顧忌二子當正色明義而不爲兇燄所脅可也乃
退縮畏沮拱手而付之道成及篡弒已成乃行苟簡
之計欲以一死報國所謂匹夫匹婦之爲諒也豈大
臣之義哉

閏月乙未宋沈攸之攻郢州

以呂祖謙
標目修

壬寅魏斬楊文

度以楊文弘爲武都王

以本紀修

乙巳宋蕭道成假黃鉞屯

新亭

以本紀修

宋順皇帝昇明二年
魏高祖孝文帝太和二年

春正月沈攸之衆潰于郢張

敬兒襲據江陵攸之自殺

以呂祖謀
以標目修

二月癸未宋蕭道

成自加太尉都督十六州軍事衛將軍褚淵爲中書監

司空吏部郎王儉爲太尉長史

以本紀修

夏四月辛卯宋殺

前郢州刺史黃回

以本紀修

五月魏禁皇族貴戚與非類昏

偶

以魏紀修

六月丁酉宋以楊文弘爲武都王

以本紀修

秋八月

乙未宋以散騎常侍中領軍蕭寔爲江州刺史江州刺

史蕭贖爲領軍將軍

以呂祖謙
標目修

九月乙巳朔日有食之

以本
紀修

丙午宋蕭道成自加太傅大都督中外軍事加殊

禮辭不受

以本
紀修

冬十月壬寅宋立皇后謝氏

以本
紀修

十二

月宋尚書令王僧虔奏補綴禮樂

以呂祖謙
標目修

大事記續編卷三十八

欽定四庫全書

大事記續編卷三十九

明 王禕 撰

齊太祖高皇帝蕭道成建元元年
魏高祖孝文帝太和三年 春正月甲辰宋以蕭

竄爲鎮西將軍都督荆湘等八州軍事荊州刺史辛亥

以蕭贖爲尚書僕射中軍大將軍開府以本紀修三月癸卯

朔日有食之以本紀修甲辰宋蕭道成自爲相國齊公加九

錫以呂祖謙標目修庚戌宋齊公道成殺臨川王綽以通鑑修夏四

月壬申朔宋齊公道成自進王爵以呂祖謙標目修甲戌宋齊

王道成殺武陵王贇

以通鑑修

丙戌宋齊王道成自加殊禮

甲午即皇帝位大赦改元

以本紀修

解題曰按本紀有犯鄉論清議一皆蕩除蓋遵宋高祖之舊也宋庠紀年通譜建元本漢武帝劉聰晉康帝苻堅年號曹操司馬氏劉裕皆出身任人之事辛勤數十年而後得之未有如蕭道成楊堅初無功德在民徒恃其姿相扼吭而攘人之國者也故齊隋運祚亦最促數詩曰皇矣上帝臨下有赫監觀四方求

民之莫維此二國其政不獲維彼四國爰究爰度上帝者之憎其式廓乃眷西顧此維與宅天命其果僭哉事見通鑑

廢宋帝爲汝陰王遷之丹揚奉朝請裴顛死之

以呂祖謀標目

修 戊戌齊以子嶷爲尚書令揚州刺史

以本紀修

齊命羣臣

言事

以呂祖謀標目修

魏罷候官

以呂祖謀標目修

五月辛亥齊斷衆

募

以呂祖謀標目修

齊封功臣褚淵等有差

以本紀修

解題曰晁說之曰自開闢以來未有比肩近臣一旦

北面稱翊贊佐命以本朝輸人者實自淵始事見通

鑑

己未齊弒汝陰王尋諡曰宋順帝辛酉殺宋宗室

以呂祖謙

修標目

解題曰宋宗室之受禍尤烈於晉矣事見通鑑

丙寅齊尊考妣曰帝后

以本紀修

齊徙兗州刺史垣崇祖爲

豫州刺史

以呂祖謙標目修

六月甲申齊立王太子贍爲皇太

子

以呂祖謙標目修

秋七月丁未齊赦交州以李長仁弟叔獻

爲刺史

以本紀修

九月丙午齊司空褚淵領尚書令

以通鑑修冬

十一月癸丑魏遣梁郡王嘉等奉前義揚王昶伐齊

以呂

祖謙標

目修

齊太祖高皇帝建元二年春正月齊王儉爲左僕射

以紀

魏高祖孝文帝太和四年二月丁卯魏攻齊壽陽垣崇祖破走之

以紀傳修

齊定簿

籍

以呂祖謙標目修

齊分荆益州置巴州

以呂祖謙標目修

夏五月齊

立六門都牆

以本紀修

秋八月魏寇齊

以本紀修

九月甲午朔日

有食之

以天文志修

閏九月魏圍朐山敗還

以通鑑修

冬十月徐

兗州民叛魏魏討之

以魏紀通鑑修

十一月戊子齊以揚後起

爲武都王

以本紀修

十二月戊戌齊褚淵爲司徒豫章王嶷

爲中書監司空揚州刺史

以本紀修

齊太祖高皇帝建元三年春正月魏攻齊淮陽敗走

以本

紀修

魏高祖孝文帝太和五年

解題曰按魏虜傳初虜至緣淮驅略江北居民懲佛

狸時事皆驚走不可禁止乃於梁山置二軍南置三

軍慈姥置一軍洌洲

在建康府江寧縣西南七十里一名粟洲

置二軍三

山去洌洲可十里置二軍白沙洲未詳置二軍蔡洲置五軍長

蘆在今真州六合縣置二軍菰浦未詳置二軍徐浦未詳置一軍

餘見通鑑

二月癸丑齊罷南蠻校尉以呂祖謙標目修秋七月己未朔日

有食之以天文志修齊聘魏以呂祖謙標目修九月魏徐兗州平以呂

祖謙標冬魏新律成以通鑑修

齊太祖高皇帝建元四年春三月庚申齊褚淵王儉受

遺壬戌齊主殂本紀

解題曰按齊紀帝少沈深有大量寬嚴清儉喜怒無色即位後身不御精細之物敕中書舍人桓景真曰主衣中似有玉介導此制始自大明末秦始尤增其麗畱此政是興長病源可即時打碎凡復有可異物皆宜隨例也每曰使我治天下當使黃金與土同價欲以身率天下移變風俗蘓軾曰帝之意則善矣然豈有此理者哉孟子曰物之不齊物之情也巨屨小屨同價人豈爲之哉而孟子亦自忘其言爲菽粟如

水火之論金之不可賤如土猶土之不可使貴如金也餘見通鑑

太子贍卽皇帝位乙丑淵錄尚書事儉爲尚書令

以本紀呂

祖謙標目修

夏六月甲申朔齊主立子南郡王長懋爲皇太

子

以本紀修

秋七月齊南康文簡公褚淵卒

以本紀修

九月楊文

宏卒魏以楊後起爲武都王

以通鑑目錄修

冬十一月魏祀廟

牲牢器服依古制

以呂祖謙標目修

齊世祖武帝蕭贍永明元年

春正月辛亥齊改元

以通

鑑修齊詔治民之官復田秩

以呂祖謙
標目修

解題曰按齊史列傳宋武以來州郡秩俸及雜供給
多隨土所出無有定準豫章王嶷上表請明立定格
班下四方永爲恒制

夏四月壬午齊改葬袁粲劉秉沈攸之

以通鑑修丁亥齊殺

五兵尚書垣崇祖散騎常侍荀伯玉

以呂祖謙
標目修

五月齊

殺車騎將軍開府張敬兒

以呂祖謙
標目修

秋七月魏聘齊

以本

紀冬十二月朔日有食之

以天文
志修

癸丑魏始禁同姓爲

婚

以呂祖謙
標目修

是歲齊省巴州

通鑑

齊世祖武皇帝永明二年

魏高祖孝文帝太和八年
齊中書舍人茹法亮呂文顯

等總重權夏六月壬寅封法亮望蔡男

以呂祖謙
標目修

解題曰事見通鑑按齊史列傳法亮與會稽呂文慶

臨海呂文顯並以姦諂事武帝文顯爲外監專制兵

權領軍將軍守虛位而已法亮文慶並勢傾天下太

尉王儉謂人曰我雖有大寄權寄豈及茹公武帝之

治其體統乃如此

丁卯魏增調帛穀始頒祿論賦

以呂祖謙
標目修

齊世祖武帝永明三年
魏高祖孝文帝太和九年

春正月戊寅魏禁讖緯巫覡

以呂祖謙
標目條

齊復立國學夏五月開學士館

以紀
傳修

冬十月

丁未魏均給田

以呂祖謙
標目修

解題曰按魏書紀傳志及通典太和元年三月詔曰

去年牛疫死太半今東作既興人須肄業有牛者加
勤於常歲無牛者倍傭於餘年一夫制治四十畝中
男二十畝無令人有餘力地有遺利給事中李安世

上疏曰竊見州郡之人或因年儉流移棄賣田宅事涉數世三長既立始復舊墟強宗豪族肆其侵凌爭訟遷延連紀不判良疇委而不開宜更均量令力業

相稱又所爭之田宜限年斷事久難明悉屬今主帝

深納之均田之制始於此矣九年給天下民田諸男

夫十五以上受露田四十畝杜佑曰不栽樹者謂之露田婦人二

十畝劉恕曰謂男夫之有奴婢依良丁牛一頭受田

三十畝限四牛劉恕曰謂戶內更有一丁未娶者反有牛一頭又受三十畝也丁牛雖多

給田止於一劉恕曰謂一丁一所授之田率倍之牛則倍三十畝三

百二十畝

易之田再倍之以供耕作及還受之盈縮諸民年及課則受田老免及身沒則還田奴婢牛隨有無以還受諸桑田不在還受之限但通入倍田分於分雖盈不得以充露田之數不足者以露田充倍初受田者男夫一人給田二十畝課蒔餘種桑五十樹棗五株榆三根非桑之土夫給一畝依法課蒔餘果及多種桑榆者不禁諸應還之田不得種桑榆棗果種者以違

令論地入還分諸桑田皆爲世業身終不還

劉恕曰謂初受

田者雖娶婦同一戶不復給田非桑之土惟種桑榆共八株故止給一畝下文云麻布之土男夫及課別

給麻田十畝婦人五畝并榆棗地亦十六畝也桑田用力最多欲勸人種桑故賜爲永業由露田有還受

故不得種桑麻恒從見口有盈者無受無還不足者受種如

法盈者得賣其盈不足者得買所不足不得賣其分

亦不得買過所足

劉恕曰謂種桑不還之田計見在男夫及丁口其合給田畝外桑田

有餘亦許爲主但不受亦不還耳若受少桑田者復受於官種桑果故盈者得賣不足者得買也 諸

麻布之土男夫及課別給麻田十畝婦人五畝奴婢

依良皆從還受之法諸有舉戶老小癘疾無受田者
年十一已上及癘者各受以半夫田年踰七十者不
還所受寡婦守志者雖免課亦授婦田還受民田恒
以正月諸土廣民稀之處隨力所及官借民種蒔後
有來居者依法封授諸地狹之處有進丁受田而不
樂遷者則以其家桑田爲正田分又不足不給倍田
又不足家內人別減分無桑之鄉準此爲法樂遷者
聽逐空荒不限異州他郡唯不聽避勞就逸其地足

之處不得無故而移諸民有新居者三口給地一畝
以爲居室奴婢五口給一畝男女十五以上因其地
分口課種菜五分畝之一諸一人之分正從正倍從
倍不得隔越他畔進丁受田者常從所近

劉恕曰謂取逐戶傍

近不必諸宰民之官各隨地給公田刺史十五頃太

地相連守十頃治中別駕各八頃更代相付

杜佑曰職分田起於此劉恕曰

後魏志云諸遠流配謫無子孫及戶絕者墟宅桑榆
盡爲公田以給授受觀均田制度似今佃官田及絕
戶田出租稅非如井田也劉石符姚喪亂之後土田
無主悉爲公田除兼并大族外貧民往往無田可耕

故孝文分官田以給之然有分限丁口計畝給田老死還納別授壯者非若今世作全戶稅佃不計其歲

月但不得典賣耳

齊世祖武帝永明四年春正月癸亥朔魏朝會始服魏高祖孝文帝太和十年

充冕

以本紀修

解題曰按魏志高祖留意文史文章百篇冠絕終古太和已後詔誥並自運筆事見通鑑

閏月楊後起卒齊魏皆以楊集始爲武都王

以本紀修

二月

甲戌魏立黨里鄰三長定民戶籍

以呂祖謙標目修

解題曰王通曰民不里居田不井授終苟道也魏孝

文之治國也庶乎其不苟矣事見通鑑

夏四月辛酉魏始置五等公服

以呂祖謙
標目修

秋九月辛卯

魏作明堂辟雍

以通
鑑修

是歲魏分置州郡

以通
鑑修

齊世祖武皇帝永明五年
魏高祖孝文帝太和十一年

春正月丁亥魏定樂章

以朱

熹綱
目修

戊子齊以太尉豫章王嶷爲大司馬車騎將軍竟

陵王子良爲司徒衛將軍王儉中軍將軍王敬則並加

開府

以呂祖謙
標目修

魏攻齊泚陽

雍州刺史陳顯達大破之

以通鑑修

解題曰按州郡志廣平郡有泚陽縣屬今唐州

泚音

夏魏大旱秋七月己丑聽民出關就食

以魏紀修

八月彘然

寇魏魏大破之

以本紀修

九月魏出宮人冬十月罷工作散

府藏

以呂祖謙標目修

齊世祖武皇帝永明六年
魏高祖孝文帝太和十二年

夏四月魏據隔城齊將軍

曹虎大破之陳顯達拔魏醴陽城

以呂祖謙標目修

解題曰按水經注醴水出南陽雒山東流歷唐山下

南逕唐城又東南逕葉縣故城北又東與葉西陂水
會又東注葉陂又東逕濩陽故城北東逕鄆縣故城

南入汝

齊世祖武皇帝永明七年

春正月辛亥魏主祀南郊

魏高祖孝文帝太和十三年

始備大駕

以本紀修

夏五月乙巳

齊南昌文憲公王儉卒

以本

紀修秋八月魏聘宋冬十二月

宋報之

以呂祖謙標目修

齊世祖武皇帝永明八年

秋八月齊殺荊州刺史巴

魏高祖孝文帝太和十四年

以通鑑修

九月癸丑魏

太皇太后殂魏主欲行三

年之喪羣臣諫乃服朞

以呂祖謙
標目修

解題曰事見通鑑胡宏曰晉武魏文徒能知母而不

知父豈禮也哉

齊世祖武帝永明九年
魏高祖孝文帝太和十五年

春正月魏主始聽政

以本
紀修

齊太廟薦藜味別祀于故宅

以本
紀修

夏四月己卯魏經始

明堂改太廟

以本
紀修

五月己亥魏主更立律令親決疑獄

以本
紀修

丙辰魏造五輅

以本
紀修

秋閏七月己卯魏始定廟祧

之制

以本
紀修

八月戊戌魏廢道壇

以本
紀修

乙巳魏定祭禮

以本
紀修

解題曰按禮志帝臨皇信堂引見羣臣詔曰禮記祭法稱有虞氏禘黃帝大傳曰禘其祖之所自出稱不王不禘論曰禘自既灌詩頌長發大禘爾雅曰禘大祭也夏殷四時禘禘烝嘗周改禘爲祠王制稱牲禘禘禘禘嘗禘鄭玄解天子祭圓丘曰禘祭宗廟太祭亦曰禘三年一禘五年一禘魯禮三年喪畢而禘明年而禘祭有兩禘明也王肅稱天子諸侯皆禘於

宗廟非祭天之祭禘祫一名也合而祭之故稱祫審禘之故稱禘三年一祫五年一禘總而互舉之故稱五年再殷祭卿等便可議其是非尚書游明根等對曰鄭氏之議禘者大祭之名宗廟禘祫並行圓丘一禘而已依禮春廢牲祫於嘗於烝則祫不於三時皆行禘祫之禮中書監高閭等對圓丘之禘於鄭義同宗廟禘祫之祭與王義同長發大禘也殷王之祭斯皆非諸侯之禮諸侯無禘禮唯夏殷夏祭稱禘又非

宗廟之禘魯行天子之儀不敢專行圓丘之禘改殷之禘取其禘名於宗廟因先有禘遂生兩名據王氏之義禘而禘祭之故言禘禘禘禘止於一時帝曰王以禘禘爲一祭王義爲長鄭以圓丘爲禘與宗廟大祭同名義亦爲當今互取二義著之於令

冬十一月己未朔魏主禪於太和廟始即吉

以呂祖謙
標目修

解題曰胡寅曰方孝文之欲三年也在廷之臣莫不沮遏帝心所陳每下非帝之至情先定幾何不爲邪

說所惑喪禮曰百官備百物具不言而事行者扶而起齊衰之喪蓋對而不言也若夫八事之權非經禮也今孝文百官備矣是宜三日而粥三月而沐期十三月而練冠三年而禘使禮廢而復起而羣臣狃於漢制雜以國俗使其君不得由改期而禘改月而禫是用古者父在爲母之服不中節矣無乃不得其本遂殺其末邪惜哉事見通鑑

乙亥魏定官品

以呂祖謙
標目修

乙酉魏始正四時迎氣

以本
紀志

修
十二月辛亥魏脩樂官
以通鑑修

大事記續編卷三十九

欽定四庫全書

大事記續編卷四十

明 王禕 撰

齊世祖武皇帝永明十年
魏高祖孝文帝太和十六年
春正月己未魏宗祀顯祖

於明堂遂登靈臺辛酉以太祖配南郊以本紀修齊竟陵王

子良領尚書令以本紀修壬戌魏承晉爲水德以呂祖謙標目修甲

子魏罷租課以通鑑修乙丑魏詔踈屬異姓王公遞降一等

以朱熹綱目修二月甲午魏主朝日於東郊以本紀修丁酉魏祀堯

舜禹文王周公丁未親祠孔子以本紀修夏四月辛丑齊豫

章文獻王嶷卒

本紀

解題曰永明末車駕數游幸唯嶷陪從上出新林苑
同輦夜歸至宮門嶷下輦辭出上曰今夜行無使爲
尉司所呵也嶷對曰京輦之內皆屬臣州願陛下不
垂過慮上笑每臨幸輒極日盡歡嶷謂上曰古來言
願陛下壽偕南山或稱萬歲此殆近貌言如臣所懷
實願陛下極壽百年亦足矣上曰百歲復何可得止
得東西一百於事亦濟

南史列傳武帝少年與新吳侯景先共車行泥路車久故

壞至領軍府西門車轅折俱狼狽景先謂帝曰兩人脫作領軍亦不得忘今日艱辛及帝踐阼以景先兼領軍將軍拜還未至府門中詔相聞領軍今日故當無折轅事邪武帝奢侈後宮萬餘人猶以爲未足疑後房亦千餘人

葉適曰蕭氏父子智識凡猥曾無毫髮爲民請命之念放飯於大物流啜於高位國祚短促皆其自取民生其間受禍迫數可勝歎哉

五月己巳尚書令竟陵王子良爲揚州刺史

以本紀修

秋八

月乙未魏伐柔然破之

以呂祖謙標目修

魏主養三老五更於

明堂

以本紀志修

九月楊集始寇齊漢中魏以爲武興王

以通

鑑冬十二月癸未朔日有食之以天文志修

齊世祖武帝永明十一年春正月丙子齊太子長懋

卒以呂祖謙標目修三月乙亥齊雍州刺史王真有罪伏誅其

子肅奔魏以本紀列傳修夏四月甲午齊立南郡王昭業爲皇

太孫以呂祖謙標目修戊戌魏立馮氏爲皇后以呂祖謙標目修秋七

月癸丑魏立子恂爲皇太子以呂祖謙標目修戊辰齊遣鎮軍

大將軍江州刺史陳顯達鎮樊城以通鑑修

解題曰按通典齊始全盛南鄭樊城襄陽義陽壽春

淮陽角城

晉義熙中置
在宿遷縣界

漣口朐山爲重鎮其後頻爲

魏所侵至東昏永元初沔北諸郡相繼敗沒又失壽

春三年齊亡事見通鑑

戊寅齊主殂中書郎王融謀立竟陵王子良左僕射西

昌侯鸞迎太孫昭業卽皇帝位八月壬午鸞爲尚書令

癸未子良爲太傅

呂祖謙
標目

解題曰按齊書列傳融文辭辯捷尤善倉卒屬綴子

良特相友好晚節大習騎馬才地既華兼藉子良之

勢傾意賓客文武翕習輻湊之招集江西僉楚數百人並有幹用世祖不豫詔子良甲仗入延昌殿待醫藥子良日夜在殿內太孫間日入參承世祖疾篤暫絕太孫未入內外惶懼百僚皆已變服融戎服絳衫於中書省閣口斷東宮仗不得進欲矯詔立子良詔草已立上重蘓問太孫所在因召東宮器甲皆入遺詔子良輔政西昌侯鸞知尚書事蕭衍謂范雲曰主上大漸國家自有故事道路籍籍將有非常之舉卿

聞之乎雲不敢答俄而帝崩融乃處分以子良兵禁
諸門西昌侯聞急馳至雲龍門不得進乃曰有勅召
我排而入奉太孫登殿命左右扶出子良指麾部署
音響如鐘融知不遂乃釋服還省歎曰公誤我爵林
深怨融餘見通鑑胡寅曰武皇不豫融欲矯詔立子
良而子良不知戎服絳衫斷東宮仗而子良不知上
殂融以子良兵禁諸門而子良又不知誠不知邪是
不智也佯不知邪是不忠也危疑之際間不容穢而

一聽融請張爲幻畧無可否至於迹涉疑似恐懼而殞乃自取之安得獨罪融哉

己丑魏主將伐齊以太尉東陽公丕等畱守

以本紀修

齊王

融伏誅

以通鑑修

九月魏聘齊

以通鑑修

辛酉齊主追尊考爲文

皇帝

以本紀修

庚午魏主至洛陽遣撫軍大將軍任城王澄

諭畱司以遷都之意冬十月戊寅朔魏營洛都

以本紀修 呂祖謙

修標目

解題曰按河南志東西二十里南北十五里廟社宮

室會府以外方三百步爲一里開四門置里正四人
門士八人總二百二十里宣武景明二年築坊三百
二十各周一千二百葉適曰孝文遷洛不止慕古人
居中土蓋欲身在近地經營江左爾明年遣盧昶等
使齊詔昶曰江揚不早當晚會是朕物卿等欲言便
言無相疑難蓋可見矣事見通鑑

壬寅齊尊太妃爲皇太后立妃何氏爲皇后

以本魏以
紀修

王肅爲大將軍長史

以呂祖謙
標目修

十一月魏鄴宮成徙御

焉

以本紀修

齊高宗明皇帝蕭鸞建武元年春正月丁未齊改元隆

魏高祖孝文帝太和十八年

昌

以呂祖謙標目修

癸亥魏主南狩三月至平城以本紀修夏四月

庚辰魏罷西郊祭天以本紀修戊子齊竟陵文宣王子良以

憂卒

以本紀修

解題曰按齊史列傳子良既亡故人皆來奔赴陸惠

曉於邸門逢袁彖問曰近者云云定復何謂王融見

殺而魏準破膽道路籍籍復云竟陵不永天年有之

乎答曰齊氏微弱已數年矣爪牙柱石之臣都盡今之所餘政風流名士耳若不立長君無以鎮安四海王融雖爲身計實安社稷恨其不能斷事以至於此道路之談自爲虛說耳蒼生方塗炭矣政當滯耳聽之餘見通鑑

閏月丁卯齊鎮軍大將軍西昌侯鸞自爲開府三月戊

辰以中軍將軍新安王昭文爲揚州刺史

以本紀修

五月甲

戌朔日有食之

以天文志修

秋七月乙亥魏以宋王劉昶爲

大將軍鎮彭城

以本紀修

士辰齊西昌侯鸞弒其主追廢之

爲鬱林王丁酉奉新安王昭文即皇帝位改元延興鸞

自爲驃騎大將軍錄尚書事揚州刺史

呂祖謙標目

解題曰宋庠紀年通譜延興本魏孝文年號

九月壬申朔魏主臨朝堂攷百官

以呂祖謙標目修

解題曰按後魏書列傳初魏自公侯以下迄于選臣
動有萬數冗散無事吏部尚書任城王澄品爲三等
量其優劣盡其能否之用咸無怨者餘見通鑑

齊蕭鸞殺司徒鄱陽王鏘等七人

以呂祖謙
標目修

冬十月齊

蕭鸞自爲太傅大將軍都督中外軍事宣城郡王加殊

禮殺江夏王鋒等五人

以呂祖謙
標目修

甲辰魏主以東陽公

丕爲太傅錄尚書事辛亥發平城

以通鑑修

齊宣城王鸞廢

其主爲海陵王癸亥自即皇帝位改元

以呂祖謙
標目修

解題曰周端朝曰荀彧以酖死劉穆之以憂死唐武

宗深仇李瑀楊嗣復事會之間略有先後便關生死

齊高宗之容謝朓不殺卞彬亦亂世一難事事見通

鑑宋庠紀年通譜建武本漢光武晉惠帝元帝石虎
慕容忠年號

十一月癸酉齊以西中郎長史始安王遙光爲揚州刺

史丙戌以西中郎將聞喜公遙欣爲荊州刺史

以呂祖謙標目

修戊子齊立子寶卷爲皇太子

以呂祖謙標目

魏主至洛陽

置牧場於河陽

以本紀呂祖謙標目

齊弒海陵王

以本紀修

十二月

辛丑魏攻齊襄陽義陽鍾離南鄭

以呂祖謙標目

壬寅魏禁

胡服

以呂祖謙標目

辛亥魏主伐齊

以本紀修

齊高宗明皇帝建武二年春正月壬申齊遣兵拒魏

紀以本癸酉魏禁侵掠呂祖謙乙未魏圍鍾離齊徐州刺

史蕭惠休破之二月魏主至壽陽丙辰至鍾離齊遣將

軍裴叔業救之義陽師退己未齊司州刺史蕭誕破之

丁卯魏主遣使臨江數齊主罪三月師還夏四月南鄭

師退庚申魏主如魯城祠孔子襄陽師退齊太子右衛

率垣厯生追破之五月癸未魏主還洛陽甲申減冗官

之祿以本紀呂祖謙六月己亥魏禁北語以呂祖謙癸丑

魏求遺書

以本紀修

戊午魏法度量

以本紀修

壬戌齊殺領軍將

軍蕭詵及撫軍將軍西陽王子明等

以呂祖謙標目修

秋八月

乙巳魏選武勇為羽林虎賁

以本紀修

魏立國子太學四門

小學

以朱熹綱目修

九月庚午魏六宮文武遷洛陽丙戌幸鄴

以本紀修

冬十月丙辰魏主至自鄴

以本紀修

壬戌魏詔州牧品

官屬得失以聞

以通鑑修

十一月甲申魏主祀園丘

以本紀修

二月丁酉齊置晉諸陵宿衛

以本紀修

甲子魏賜羣臣冠服

以本紀修魏鑄太和五銖始用錢

以呂祖謙標目修

齊高宗明皇帝建武三年
魏高祖孝文帝太和二十年
春正月魏改姓元氏并改

羣臣姓

以呂祖謙
標目修

解題曰葉適曰書稱別生分類而傳有賜姓命氏之
文蓋帝王諸侯各爲族姓義不相襲後世封建法廢
既無專國不爲自族姓而天子亦無賜姓命氏之法
至傳國數百年而臣下仍用舊氏與編戶齊民無別
蓋以兵力崛起而無德勢不暇爾雖然尊前代而慕
聖賢使其後人以風流相命則猶可言也及魏起深

北不毛以九十九姓爲部落姓改氏易流布諸華至隋唐凡胡邱周伊穆陸劉賀梁冠羅葛樓鮑何高潘薛甄杜之類皆夷種而三代漢魏之氏族蕩不可識矣餘見通鑑

魏詔定諸州士族

以呂祖謙
標目修

二月壬寅魏聽羣臣終三

年喪

以呂祖謙
標目修

三月壬午齊去乘輿金銀飾

以本
紀修

夏五

月魏禁漢魏晉諸陵樵蘇

以本
紀修

丁亥魏主祀方澤

以本
紀修

秋七月魏廢皇后馮氏

以本
紀修

冬十月戊戌魏以代遷之

士皆羽林虎賁司州民十二夫調一爲四年更卒歲開

番假以供力役

以本紀修

閏十二月丙寅魏廢太子恂爲庶

人

以呂祖謙標目修

戊辰魏置常平倉

通鑑

魏恒州刺史穆泰定

州刺史陸叡等謀反遣吏部尚書任城王澄執之

以呂祖謙

標目修

解題曰恒州領代郡善無梁城繁峙高柳北靈邱內

附靈邱

今嵐州之地

八郡定州領中山

真定中山之地

常山

真定府平

定鉅鹿

真定府深祁二州之地

博陵

深州祁州之地

北平

中山府易州之地

五

郡

齊高宗明皇帝建武四年春正月丙申魏立子恪

魏高祖孝文帝太和二十一年

爲皇太子

以呂祖謙
標目修

乙巳魏主北巡

通鑑

丙辰齊殺尚書

令王晏二月甲子以左僕射徐孝嗣爲尚書令

以本
紀修

癸

酉魏主至平城穆泰陸叡伏誅免并州刺史新興公丕

爲民

以通
鑑修

解題曰穆泰爲定州刺史辭以疾病上溫則甚請恒
州自效高祖許之乃以恒州刺史陸叡爲定州泰代

焉泰不願遷都叡未及發而泰已至遂潛相扇誘圖
爲叛乃與叡及安樂侯隆撫冥鎮將魯郡侯業驍騎
將軍超鎮北將軍樂陵王思譽等謀推朔州刺史陽
平王頤爲主頤不從僞許以安之密表其事高祖乃
遣任城王澄率并肆兵以討之澄先遣治書侍御史
李煥單車入代出其不意泰等驚駭計無所出煥曉
諭逆徒示以禍福於是凶黨離心莫爲之用泰自度
必敗乃率麾下數百人攻煥冀以一捷不克單馬走

出城西爲人擒送澄尋亦到窮治黨與高祖幸代親見罪人問其反狀秦等伏誅餘見通鑑葉適曰秦與陸叡元丕遂誘子恂爲逆皆緣遷都乃知盤庚委曲告諭非畏其臣也

夏四月魏殺故太子恂

以呂祖謙標目修

解題曰按齊書魏虜傳初僞太后馮氏兄昌黎王馮莎二女大馮美而有疾爲尼小馮爲皇后生僞太子恂後大馮疾差納爲昭儀宏初徙都恂意不樂思歸

桑乾宏制衣冠與之恂竊毀裂解髮爲編服左衽大
馮有寵日夜讒恂宏出鄴城馬射恂因是欲叛北歸

密選宮中御馬三千匹置河陰渚皇后聞之召執恂

馳使告宏徙恂無鼻城

侯河陽水經注澳水東南
逕無辟邑謂之無比城亦

曰馬鼻
城非也

尋殺之立大馮爲皇后餘見通鑑馮太后親

弑高宗者也而孝文乃立其二姪女爲后既廢小馮
而立大馮復因大馮之譖而殺其子而大馮亦卒以
淫亂廢死以孝文之賢生性過人獨於大倫之際顧

弗加察豈夷之爲俗不能遽除故邪

六月庚申魏主遷洛陽

以本紀修

秋七月甲午魏立昭儀馮

氏爲皇后

以呂祖謙標目修

八月庚辰魏主伐齊

以本紀修

氏帥楊

靈珍襲揚集始九月丁酉魏遣河南尹李崇討之

以本紀修

魏攻齊南陽

以本紀修

魏李崇克武興以爲梁州刺史

以通鑑修

冬十月丁巳魏主攻齊新野甲戌齊遣太子中庶子蕭

衍等救雍州

以本紀通鑑修

十一月齊以楊靈珍爲武都王

以本

紀修十二月丁丑齊遣度支尚書崔慧景救雍州

以本紀修

將軍魯康祚豫州刺史裴叔業侵魏魏豫州刺史王肅

敗之

以通鑑修

齊高宗明皇帝永泰元年魏高祖孝文帝太和二十二年

春正月丁亥魏拔新野

齊沔北諸戍皆遁

以本紀修

乙未齊遣太尉陳顯達救雍州

以本紀修

丁未齊殺河東王鉉等十人高武子孫遂盡

以本紀修

解題曰葉適曰魏晉取人之國甚酷多殺賢士大夫而其子孫獨得免知廢興存亡之要不在此故也至劉裕懲創司馬復興遂殘滅無遺育而蕭道成效之及

其甚也驚以庶代宗亦然哀哉事見通鑑

二月甲子魏拔南陽

呂祖謙標目

三月壬午朔齊崔慧景蕭

衍敗於鄧城

以通鑑修

解題曰今襄陽府襄陽縣有舊鄧城鎮即漢舊縣

辛亥魏主如懸瓠王肅攻義陽齊裴叔業圍渦陽以救

之大破魏師叔業軍亦潰

以通鑑修

解題曰渦陽今亳州蒙城縣

夏四月甲寅齊改元

以本紀修

丁卯齊大司馬會稽太守王

敬則反五月伏誅

以呂祖謙
標目修

秋七月壬午魏減宮掖近

屬費以給軍賞

以本
紀修

癸卯齊太子中庶子蕭衍爲雍州

刺史

以呂祖謙
標目修

解題曰按梁史列傳張弘策弘胄從武帝宿酒酣語

及時事帝曰天下方亂舅知之乎冬下魏軍方動則

亡漢北王敬則猜嫌已久當乘間而作弘策曰敬則

張兩紅眼容能立事帝曰敬則庸才爲天下唱先爾

主上運祚盡於來年國權當歸江劉而江甚隘劉又

閻弱都下當大亂死人如麻齊之厯數自茲亡矣梁
楚漢當有英雄興弘策曰瞻烏爰止于誰之屋帝笑
曰安知非僕弘策起曰今夜之言是天意也請定君
臣之分帝曰舅欲效鄧晨乎是冬魏攻新野明帝密
詔武帝代曹虎監雍州事弘策聞之心喜謂帝曰夜
中言當驗帝笑曰且勿多言弘策從帝西行餘見通

鑑武帝即

蕭衍

己酉齊主殂太子寶卷即皇帝位

以本紀修

九月己亥魏以

不伐喪退師

以呂祖謙
標目修

冬十一月戊子齊立妃褚氏爲

皇后

以本
紀修

齊東昏侯蕭寶卷永元元年

魏高宗孝文帝太和二十二年春正月戊寅朔齊改元

以本
紀修

解題曰宋庠紀年通譜永泰以疾不瘳望氣者云宜

改元永元本漢和帝張茂年號

齊遣太尉陳顯達等擊魏癸未魏前將軍元英拒之

以呂

祖謙標
目修

戊戌魏主至洛陽

以通
鑑修

二月癸亥魏以中軍上

將軍彭城王勰爲司徒

以本紀修

齊陳顯達破中山王英取

馬圈

呂祖謙標目

解題曰按齊書列傳馬圈城去襄陽三百里方輿志

在鄧州穰縣北後魏立爲鎮卽漢沮陽縣地

三月庚辰魏主發洛陽顯達大敗而還

以呂祖謙標目修

夏四

月丙午朔魏主殂於穀塘原賜皇后馮氏死彭城王勰

奉喪至魯陽丁巳太子元恪卽皇帝位

本紀

解題曰魏氏之興且百年矣至孝文始興禮樂修制

度又慕中華遷居洛邑然不過一再傳國遂分裂以
底於亡或者遂謂去乎夷狄而未能合乎中國則足
以速其亡而已蓋魏之所以亂者始於世宗政事之
不修繼以胡后之淫亂元禧元雍之輔相無狀劉騰
元乂之黷貨稔釁興禮樂修制度慕中華何預焉事
不察其原而猥其迹則儒者之論幾於可廢矣事見

通鑑

按魏書地形志睢州穀陽郡治穀陽城太和中置郡

五月魏以侍中北海王詳爲司空鎮南將軍王肅爲尚

書令鎮南大將軍廣陽王嘉爲左僕射尚書宋弁爲吏

部尚書與太尉咸陽王禧右僕射任城王澄等輔政總

都督冀定等七州軍事定州刺史

以本紀修

六月戊辰魏主

追尊母高氏爲文昭皇后封后兄肇爲平原公

以通齊鑑修

始安王遙光撫軍大將軍開府徐孝嗣右僕射江柘中

領軍蕭坦之侍中江祀衛尉劉暄更直內省蕭衍聞之

修武備柘議廢立秋八月殺柘及祀乙卯遙光據東府

起兵已未敗死

以紀傳修

解題曰按梁元帝金樓子遙光將敗都不識人孫樂
祖曹樹生常心腹委付問孫卿是誰樹生曰是孫樂
祖仍復問卿是誰曹以名答于時名士偕在側見不
識人沈昭略昭光之徒一時皆去餘見通鑑齊之始
安猶宋之建安也建安教明帝殺孝武諸子而尋亦
見及始安教明帝殺高武子孫而卒亦無所容不但
身受其害而國亦隨之哀哉

己已齊以孝嗣爲司空坦之爲右僕射暄爲領軍將軍

閏八月殺坦之及暄冬十月乙未齊殺孝嗣及將軍沈

文季

以呂祖謙標
目及紀傳修

十一月丙辰齊太尉江州刺史陳顯

達反十二月甲申罷宮城乙酉伏誅

以呂祖謙
標目修

解題曰按齊書列傳自江拓始安王遙光等誅後左

右應敕捉刀之徒並專國命人間謂之刀敕權奪人

主時徐世擿尤見寵信自殿內主帥爲直閣驍騎將

軍陳顯達事加崔慧景侍中護軍將軍平南將軍都

督衆軍事屯中堂加世擿輔國將軍專勢號令慧景

備員而已餘見通鑑薛季宣曰世祖任外監則領軍
但守虛位東昏信直閭則都督實不領兵甚者御刀
用事謂之八要故蕭衍謂以昏主役刀敕之徒爲不
足畏者此也

魏制官品

以呂祖謙
標目修

齊東昏侯永元二年
魏世宗宣武帝元恪景明元年

春正月乙巳魏改元

以本

紀齊冠軍將軍豫州刺史裴叔業叛降魏丁未魏遣驃

騎大將軍彭城王勰等赴壽陽二月戊戌勰爲揚州刺

史已亥叔業死三月乙卯齊遣平西將軍崔慧景討之
夏四月慧景至廣陵反南徐兗二州刺史江夏王寶玄
入之慧景圍宮城征虜將軍豫州刺史蕭懿赴難慧景
敗死丙申彭城王勰敗齊將軍驃騎司馬陳伯之于硤
石取合肥建安五月己酉寶玄死六月勰進大司馬秋
七月伯之攻壽陽八月乙酉勰大破之於肥口淮南入

于魏

以本紀及齊紀
呂祖謙標目修

解題曰按齊書州郡志郢州有建安左郡又按水經

注淮水逕壽陽縣西北肥水從縣城西北入淮謂之
肥口在今安豐軍壽春縣應劭注西漢肥陵云夏水
出城父城東南至此與肥合故曰合肥唐盧潘云肥
水出鷄鳴山北流二十里分爲二其一東南流經合
肥縣南東南入巢湖其一西北流二百里出壽春西
投于淮爾雅歸異出同曰肥

冬十月己卯齊殺尚書令蕭懿

以本紀修

丁亥魏大司馬彭

城王總錄尚書事

以本紀修

十一月齊蕭衍及西中郎長史

行荊州事蕭穎胄奉荊州刺史南康王寶融舉兵十二

月穎胄遣將軍楊公則降湘州

以呂祖謙
標目修

魏罷鹽禁以食

貨志
修

解題曰見魏孝文延興五年解題

齊和皇帝中興元年
魏世祖宣武帝景明二年

春正月乙巳齊蕭衍等奉南

康王寶融爲相國戊申衍發襄陽

以本紀
梁紀修

庚戌魏主親

政罷彭城王勰咸陽王禧爲太保北海王祥爲大將軍

錄尚書事恒州刺史于烈爲領軍魏主年少倖臣外戚

用事魏政浸衰

以本紀通鑑修

二月齊蕭衍圍魯山攻郢城

本紀

解題曰蕭衍之攻郢城無異沈攸之之攻郢城而成敗不同何也天命之向背人心之去就先後有不同

故也事見通鑑

魯山在今漢陽軍

三月乙巳南康王寶融即皇帝位于江陵改元丙午廢其主爲涪陵王以尚書令蕭穎胄行荊州刺史加左僕

射蕭衍都督征討軍事假黃鉞

以本紀修

解題曰宋庠紀年通譜中興本慕容年號

夏五月魏咸陽王禧謀反伏誅

以本紀修

齊巴西巴東郡遣

兵擊蕭穎胄涪陵王遣軍主吳子陽等救郢州秋七月

甲午雍州刺史張欣泰等謀廢涪陵王不克死丁酉蕭

衍遣兵襲破子陽丁巳魯山降己未郢城降八月江州

刺史陳伯之降

以齊紀通鑑修

九月魏築洛陽諸坊

以本紀修

己亥

魏立皇后于氏

以本紀修

冬十月甲戌齊蕭衍大敗將軍王

珍國等於朱雀航圍宮城

以呂祖謙標目修

十一月丁酉魏北

海王祥爲太傅領司徒

以本紀修

壬寅齊巴東公蕭穎胄卒

以呂祖謙
標目修

解題曰按齊史列傳武帝年垂強仕方有家嗣時徐
元瑜降而又穎胄暴卒時人謂之三慶則武帝之存
心可見矣餘見通鑑

魏鎮南將軍元英請南伐不報

以呂祖謙
標目修

解題曰按後魏書列傳平南將軍荊州刺史元嵩表
蕭寶卷骨肉相殘忠良先戮流聞寶卷荊州刺史蕭
衍兄懿於建康阻兵與衍相持荊郢二州刺史並寶

卷之第臣若遣書相聞并力除衍平衍之後彼必旋師赴救丹陽當不能固全漢沔臣之兵威已得臨據則沔南之地可一舉而收斫兵觀釁若其零落之形也影便可順流摧鋒長驅席卷既而行克建康乃止

通鑑止載

元英源懷之請而不及此

十二月丙寅齊王珍國等弒涪陵王蕭衍以宣德太后令廢之爲東昏侯衍自爲大司馬錄尚書事揚州刺史承制潘貴妃及外監茹法珍等伏誅

以齊紀通鑑修

大事記續編卷四十

欽定四庫全書

史部

大事記續編卷四十二

詳校官檢討臣朱依炅

編修臣裴謙覆勘

總校官編修臣倉聖脉

校對官助教臣胡予襄

謄錄監生臣孔繼峰

欽定四庫全書

大事記續編卷四十一

明 王禕 撰

梁高祖武帝蕭衍天監元年 春正月戊戌齊宣德太

魏世宗宣武帝景明三年

后臨朝稱制蕭衍自為都督中外軍事加殊禮甲寅自

為相國梁公加九錫二月殺太常湘東王寶暉等三人

丙寅以驃騎司馬沈約為吏部尚書兼右僕射黃門侍

郎范雲為侍中丙戌衍進王爵三月辛丑殺中將軍邵

陵王寶攸等三人衛將軍鄱陽王寶寅奔魏齊主東歸

夏四月丙寅梁王衍自即皇帝位改元丁卯廢齊主為巴陵王遷之姑孰治書侍御史顏見遠死之

以呂祖謙標目修

解題曰宋庠紀年通譜天監取詩云天之降監初齊

和帝鎮荊州以顏見遠為錄事參軍及即位以為治

書侍御史兼中丞高祖受禪見遠乃不食發憤數日

而卒帝聞之曰我自應天從人何預天下士大夫事

而顏見遠乃至於此也餘見通鑑

胡寅曰易之革曰湯武革命順乎天

而應乎人未聞應天也應者對感而為言人事作於下則天理應於上豈可天感乎上而人應乎下歟故

易惟曰順乎天順天者順理也晁說之曰方百僚署名送東昏首時王志獨憤歎不署張充偃蹇不來會江蒨在江州拒高祖之師不受命顏見遠觀高祖即位不食以死姚察徒稱充之典選廉平蒨以風格顯畧不一言其大節何耶

梁主追尊考妣為帝后封功臣十五人為公侯沈約為尚書僕射范雲為散騎常侍吏部尚書

以本紀修

戊辰梁弒

巴陵王

以呂祖謙標目修

解題曰齊自高帝至和帝五世通鬱林王昭業海陵恭王昭文為七世凡二十四年

梁議贖刑

以本紀修

解題曰朱熹曰贖刑蓋本舜典金作贖刑之語實則不然舜典所謂贖者官府學校之刑爾若五刑則固未嘗贖也五刑之寬惟處以流鞭扑之寬方許其贖漢張敞以討羌兵食不繼為入穀贖罪之法初未嘗及殺人與盜之罪而蕭望之等猶以為如此則富者得生貧者獨死恐開利路以傷治化曾謂唐虞之世而有是贖法哉惟周穆盤遊無度財匱民勞至其末

年無以為計乃為贖刑之法以斂民財後世當戒而不當遵也事見通鑑

齊宗室南康侯子恪等仕梁以壽終

以呂祖謙
標目修

解題曰姚察曰昔魏藉兵威而革漢運晉因宰輔乃移魏歷異乎古之禪授以德相傳故抑前代宗枝用絕民望然劉焜曹志猶顯於朝及宋遂為廢姓而齊之戚屬一皆殲焉其祚不長抑亦由此有梁革命弗取前規高祖之弘量度越前代矣胡寅曰梁武雖以

兵取而其資非殘忍之人也故於子恪等能保全之
向使沈約不進邪說則必封巴陵於小國俾主齊祀
矣帝以利害所迫狃於弊俗未受命間先殺寶攸等
以脅中外既受命又惑於約而有鄭伯禽之事是皆
不知命之所為詩曰商之孫子其麗不億上帝既命
侯于周服侯服于周天命靡常夫惟順天而受命則
命在我矣何虞乎商之復得而勦其後裔哉向使武
帝移待子恪之心以待巴陵王與寶攸等豈不為五

朝盛德之主耶事見通鑑

梁徵前中書令謝朓處士何點點弟前國子祭酒肩塗

朓肩不至

以本紀修

梁鎮軍大將軍江州刺史陳伯之反五

月戊子遣領軍將軍王茂討之

以本紀修

六月梁以楊紹先

為武都王

以本紀修

陳伯之攻豫章不克遂奔魏

以本紀修

梁益

州刺史劉季連反

以呂祖謙標目修

秋八月梁定律令制鍾律

以梁紀隋樂志修

冬十一月甲子梁立子統為皇太子

以呂祖謙標目

修魏洛陽宮室始成

通鑑

是歲梁大旱

以梁紀修

梁高祖武皇帝天監二年
魏世宗宣武皇帝景明四年
春正月乙卯梁沈約范雲

為左右僕射

以本紀修

梁劉季連降

以呂祖謙標目修

夏四月癸未

朔魏以蕭寶寅都督東揚等三州軍事東揚州刺史齊

王陳伯之都督淮南軍事江州刺史

以本紀傳修

五月丁巳

梁霄城文侯范雲卒尚書左丞徐勉右衛將軍周捨兼

政

以呂祖謙標目修

梁斷郡縣獻奉

以朱熹綱目修

六月梁以謝朓為

司徒尚書令

以本紀修

秋七月庚午魏復鹽池之利

以本紀修

辛

未魏以彭城王勰為太師

以本紀修

八月庚子魏以元英都

督征義陽諸軍事司州刺史

以本紀修

冬十一月楊集始卒

己未魏立其子紹先為武興王

以通鑑修

癸亥魏侍中左僕

射源懷行北邊六鎮三州懷奏損鎮官

以魏紀傳修

解題曰梁載言十道四蕃志六鎮在靈州懷遠縣杜

佑通典既於靈州懷遠縣注云漢富平縣魏六鎮在

此又於馬邑雲中單于界注六鎮在焉豈靈州與雲

中封壤相錯耶李吉甫元和郡縣志豐州天德軍城

北六十里沃野故城即六鎮從西第一鎮

陸恭之風土記云朔

方故城後魏太和十年改為沃野鎮正始三年尚書源思禮撫巡蕃塞以沃野鎮居南與蘭山澤六鎮不齊別置

東受降城光祿城東北有懷朔古鎮即六鎮三戌

從西第二鎮東受降城武川城即六鎮從西第三鎮

按魏本紀太和十八年魏主幸懷朔武川撫冥柔玄

四鎮詔賜六鎮及禦夷城民粟是禦夷在六鎮之外

也又明帝改沃野懷朔薄骨律武川撫冥柔玄懷荒

禦夷諸鎮為州豈懷荒禦夷為州而沃野懷朔薄骨

律武川撫冥柔玄自為六鎮歟

又通典後魏置懷荒禦夷二鎮於蔚州

魏納貴嬪高氏

以呂祖謙
標目修

梁高祖武帝皇帝天監三年
魏世宗宣武皇帝正始元年

春正月丙寅魏改元

以魏
紀修

解題曰宋庠紀年通譜正始本魏高貴鄉公高雲年

號

二月魏任城王澄攻梁鍾離夏四月乃退

以呂祖謙
標目修

五

月丁未朔魏免太傅錄尚書北海王詳為庶人尋殺之

以通
鑑修

解題曰按北史列傳帝密令害之故書殺

秋七月梁將軍馬仙琕救義陽大敗八月乙酉魏降義

陽取三關封元英為中山王

以梁紀
魏紀修

解題曰三關者平靖關一曰行者坡在信陽軍南武

陽關一曰大寨廣峴關一曰九里關亦屬信陽軍界

左傳蔡侯吳子伐楚還塞大隧直轅冥阨乃武陽平

靖

冬十一月戊午魏營國學

以魏
紀修

解題曰按北史儒林傳序魏道武初定中原立太學

置五經博士天興增國子太學生員太武天安初詔
立鄉學太和建明堂辟雍尊三老五更又開皇子之
學及遷都洛邑詔立國子太學四門小學大抵南北
所為章句好尚互有不同江左周易則王輔嗣尚書
則孔安國左傳則杜元凱河洛左傳則服子慎周易
則鄭康成詩則並主於毛公禮則同遵於鄭氏餘見
通鑑

甲子梁除金贖罪之科

以通鑑修

十二月己亥魏議定律令

以魏紀修

梁高祖武皇帝天監四年春正月癸卯朔梁置五經

魏世祖宣武皇帝正始二年

博士開五經館

以本紀修

解題曰按儒林傳序江左草創日不暇給迄于宋齊國
學時或開置而勸課未博建之不及十年廢之多歷
世祀高祖詔求碩學治五禮定六律天監四年置五
經博士廣開館宇招內後進於是以平原明山賓吳
國沈峻建平嚴植之會稽賀瑒補博士各主一館館

有數百生其射策通明者即除為吏十數月間懷經負笈者雲會又選學生如會稽受業於何胤分遣博士祭酒到州郡立學七年又詔大啓庠敷博延胄子命皇太子皇子宗室王侯就業高祖親釋奠於先師先聖申之以謙語勞之以束帛濟濟焉洋洋焉大道之行也如是蓋武帝孜孜學問博通經術故於庠序知所崇尚然其於聖經豈真有所得哉不然何委身釋氏竟以亡天下也餘見通鑑

梁漢中太守夏侯道遷降魏魏以尚書邢巒為鎮西將

軍赴之二月取漢中夏四月入劔閣

以呂祖謙
標目修

梁益州

刺史蕭淵藻殺前刺史鄧元起坐貶

以通鑑修

六月庚戌梁

初立孔子廟

以通鑑修

秋七月魏軍逼梁涪城通鑑冬十月丙

午梁大舉伐魏以揚州刺史臨川王宏都督軍事

以本紀修

楊紹先稱帝十一月戊辰朔魏討之

以通鑑修

魏邢巒請取

蜀不從

以呂祖謙
標目修

是歲梁大有年

以梁紀修

梁高祖武皇帝天監五年
魏世宗宣武皇帝正始三年

春正月壬申魏滅楊氏以

其地為東益州

以呂祖謙
標目修

解題曰按通典漢建安中氐酋楊騰為部落大帥騰
子駒始據仇池後有名千萬者魏拜為百頃氏王孫
飛龍漸盛晉武帝假西平將軍還居畧陽茂搜元康
初還保百頃苻堅克之茂搜孫宋奴二子佛奴佛狗
佛奴子定有秦州之地後與乞伏乾歸戰見殺佛狗
子盛襲位至紹先為魏所滅以為武興鎮後改為東
益州地形志東益州領武興仇池槃頭洛聚

並沔州
之地

廣萇

未詳

廣業

未詳

梓潼

未詳

七郡

三月丙寅朔日有食之

以梁本紀修

丁亥陳伯之自壽陽歸

梁

以本紀修

夏四月乙未魏罷鹽池禁

以北史本紀修

庚戌魏以中

山王英為征南將軍拒梁軍五月梁取魏宿預梁城合

肥羊石霍丘等城六月取朐山城秋七月魏安將軍都

督東討軍事邢巒敗梁師九月取宿預己丑梁臨川王

宏軍潰于洛口冬十月魏中山王英圍鍾離十一月梁

遣將軍曹景宗救之

以通鑑梁紀魏紀傳修

解題曰水經注淮水北注下蔡縣故城東又東徑八
公山北又東逕梁城四瀆編案兩淮對境圖濠州城
澗鎮黃團新城之間有梁城灘北對歐村二十里洛
河二十五里羊石魏書列傳彭城王騶至壽春東定
城戍至於陽石則陽石蓋在壽春之東也又東闕樅
水陽石合肥有急懸之切則陽石蓋邇於合肥也寰
宇記霍邱縣本梁所置霍邱戍隋開皇為縣

梁高祖武皇帝天監六年
魏世宗宣武皇帝正始四年

春二月梁遣豫州刺史帝

叡救鍾離三月與曹景宗大破魏軍中山王英走秋八

月英坐除名

以本紀修

解題曰葉適曰江南自劉裕後惟常叡邵陽洲之捷最偉時魏號百萬連城數十不止為一鍾離也昔徐晃救曹仁破堰城四冢屯陷入圍裏遂全樊城叡於曹景宗營前立城致敵來攻裝艦為水軍拔柵斫橋魏人崩潰而鍾離自解晃以勇奪敵氣叡以勇奪敵勢故皆能取勝也事見通鑑

冬閏十月乙丑梁驃騎將軍開府臨川王宏為司徒左

僕射沈約為尚書令

以梁紀修

丁卯魏尚書令高肇弒皇后

于氏

以朱熹綱目修

梁高祖武帝天監七年魏世宗宣武帝永平元年

春正月梁定品班

以列傳修

解題曰按梁史列傳天監初官名互有省置徐勉撰

立選簿奏之有詔施用開九品為十八班自是貪冒

苟進者以財貨取通守道淪退者以貧寒見沒矣

二月庚午梁置州望郡宗鄉豪掌搜薦

以梁紀修

三月戊

子魏高肇殺皇子昌

以朱熹綱目修

秋七月甲午魏立貴嬪高

氏為后

以魏紀修

八月魏冀州刺史京兆王愉反乙丑遣鎮

北將軍李平討之

以魏紀修

解題曰宋庠紀年通譜改元建平本漢哀帝石勒慕

容盛慕容德白亞栗斯劉義宣年號

丁卯魏改元

以魏紀修

解題曰宋庠紀年通譜永平本漢明帝晉惠帝年號

九月戊戌魏殺彭城王勰

以皇極經世修

魏京兆王愉伏誅

以呂

祖謙標
目修

梁取三關魏遣中山王英救之冬十月懸瓠降

梁梁取魏宿豫安陸諸城十二月己未魏鎮南將軍都

督南討軍事邢巒拔懸瓠

以呂祖謙
標目修

解題曰通典梁氏雍州下澁戍

漢東郡棗陽縣東南

夏口白苟

堆

在京汝南郡真陽縣大同中東魏遣堯雄為南境守將曰白苟堆梁北面重鎮請備之

硤石

城

下蔡縣

合州

即合肥

鍾離淮陰朐山為重鎮及景平後

江北悉陷高齊漢蜀沒于西魏安陸梁置南司州

宋德

安府

是歲柔然佗汗可汗為高車王彌俄突所殺

以呂祖謙
標目修

梁高祖武皇帝天監八年
魏世宗宣武皇帝永平二年

春正月梁令諸儒草封禪

儀著作郎許懋議古無封禪納之

以呂祖謙
標目修

解題曰梁武於是賢於漢唐之君遠矣事見通鑑

魏取三關

以呂祖謙
標目修

三月魏侵梁雍州刺史吳平侯曷

大破之

以通鑑
修

冬十一月己丑魏主講佛書

以呂祖謙
標目修

解題曰帝於式乾殿為諸僧及朝臣講維摩詰經帝

篤好佛理常於禁中親講經論沙門條錄為內起居

上既崇之下彌企尚至延昌中州郡僧尼寺積有一萬三千七百二十七所餘見通鑑朱熹曰佛教初入中國止有四十二章經是古書至東晉有談義如今講師作議一篇總說之今則文字至多餘見天監十五年求佛書于西域解題

梁高祖武皇帝天監九年

魏世宗宣武皇帝永平三年 春正月庚寅梁新作緣淮

塘

以本紀修

三月己丑梁主幸國子學詔皇太子以下皆入

學

以本紀修

夏四月丁巳梁詔尚書令史用士流

以呂祖謙標目修

解題曰朱黼曰周官太宰小宰宰夫之屬上士八人
中士十有六人下士三十有二人凡天下之務百官
羣有司之事無不闡決總督也今行文書之史僅十
有二而士乃五十六何賤者寡而貴者多乎蓋掌官
法官常以相切磋而出政令者非奔走服力小夫之
所當與也使小夫足以辦此則苟可以為利行奸者
烏得而盡察之不若付之賢士雖文書闕略不足慮
也漢自蕭何以刀筆致相位遂謂天下大事苟知文

書者皆足以相參考於是特立誦書九千文之科用以擇吏曹參繼之擇郡國史亦不過木訥淳謹而已自是以往令史雖非士流然相府掾屬尚擇人也魏

晉以下遂專以國事委之吏胥武帝全用士流要不

為無意也

按梁書良吏傳序高祖在田知民疾苦梁臺建仍下寬大書東昏時雜調悉除省逮

踐皇極躬覽庶事日昃聽政求民之瘼乃命輜軒以省方俗置肺石以達窮民始去貲計丁為布身服浣濯之衣太官徹牢饌日膳蔬菜飲酒不過三醖以儉先海內每選長吏務簡廉平皆召見親勗治道始擢尚書殿中郎到溉為建安內史左民侍郎劉駿為晉安太守又若令小縣有能遷大縣大縣有能遷二千

石於是山陰令邱仲孚治有異績以為長沙內史武康令何遠清公以為宣城太守剖符為吏者往往承

馬風

是歲梁始行大明曆

以梁紀修

梁高祖武皇帝天監十年
魏世宗宣武皇帝永平四年

春三月盜殺梁東莞琅琊

太守以朐山降魏魏遣徐州刺史盧昶赴之夏四月梁

遣將軍馬仙琕擊之冬十一月朐山降十二月昶走仙

琕追擊大破之

以稽古錄修

解題曰按魏書列傳自經理江左唯中山王英敗於

鍾離昶於朐山失利最為甚焉餘見通鑑

是後南北州名不可勝紀

以呂祖謙
標目修

解題曰按宋書州郡志地理參差其詳難舉實由名
號驟易境土屢分或一郡一縣割成四五四五之中
亟有離合千回百改巧厯不算尋校推求未易精悉
葉適曰時代遷換南北割裂而地之去留無常是人
事不能免至於樂變慕廣不求於政而求於地則後
世之通患也其後又不止此或州增複名郡累冗號

無益而祇為異去古逾遠矣書地之法當存舊繫雅削浮沒猥而已

梁高祖武皇帝天監十一年春正月丙辰魏以車騎大魏世宗宣武皇帝延昌元年

將軍尚書令高肇為司徒尚書僕射清河王懌為司空

以魏紀修夏四月乙丑魏改元以魏紀修冬十月乙亥魏立子翊

為皇太子以魏紀修十一月梁五禮成行之以梁紀修

解題曰普通五年中軍將軍徐勉上修五禮表伏尋所定五禮起齊永明三年太子步兵校尉伏曼容表

求制一代禮樂於時參議置新舊學士十人止修五
禮軍火散失天監元年尚書左丞何佟之啓審省署
之宜敕使外詳時尚書叅詳欲省禮局併還尚書儀
曹詔即撰次於是尚書僕射沈約等請五禮各置舊
學士一人各自舉學士二人相助抄撰乃以右軍記
室參軍明山賓掌吉禮中兵騎兵參軍嚴植之掌凶
禮中軍田曹行參軍賀瑒掌賓禮征虜記室參軍陸
璉掌軍禮右軍參軍司馬聚掌嘉禮何佟之總其事

後以鎮北諮議參軍伏暄代之更使鎮軍將軍沈約
太常卿張充及臣三人同參厥務又使中書侍郎周
捨庾於陵復豫參知大凡一千一百七十六卷八千
一十九條餘見通鑑葉適曰雖去取得失之中不可
知然一時君臣不可謂不盡其心矣考之隋經籍志
惟存吉禮十卷賓禮九卷

梁高祖武皇帝天監十二年春二月庚辰盜殺梁青冀
魏世宗宣武皇帝延昌二年

二州刺史張稷以降魏梁北兖州刺史康絢討平之通

鑑修

解題曰按齊州郡志建元初以東海一郡屬冀州全領一郡治連口通典泗州漣水縣齊冀州寄治於此北兗州宋置於淮陰

閏三月乙丑梁建昌隱侯沈約卒

以梁紀修

夏六月癸巳梁

新作太廟

以梁紀修

秋魏恒肆二州頻年地震山鳴

以通鑑修

解題曰肆州治九原領永安

宋太原府忻代雲三州之地

秀容

嵐憲

忻代四州奇嵐寧化

火山保德四軍之地

雁門

代州之地

宋白續通典秦始皇

移樓煩郡於善無縣今句注山北下館城是也故續
漢書云鴈門郡治陰館魏文帝移郡南度句注置廣
武城後魏明帝移置廣武東古上館城初太平二年
置肆州寄治忻州秀容城周宣帝移於此為代州三
郡

梁高祖武皇帝天監十三年
魏世宗宣武皇帝延昌三年冬十月辛亥魏以高肇為

大將軍大都督攻梁益州中護軍元遙為征南將軍都

督遏梁楚

以魏紀修

梁初堰淮

以呂祖謙標目修

梁高祖武皇帝天監十四年春正月丁巳魏主殂皇太
魏世宗宣武皇帝延昌四年

子詡即皇帝位紀以魏已未魏罷兵標以呂祖謙魏以右僕

射任城王澄為尚書令與太保高陽王雍秉政御史中

丞王顯弗從領軍將軍于忠誅之二月庚辰尊皇后為

皇太后召高肇還辛巳伏誅標以呂祖謙

解題曰按列傳于忠與門下議以肅宗幼年未親機

政太尉高陽王雍屬尊望重宜入居西栢堂省決庶

政任城王澄明德茂親可為尚書令總攝百揆奏中

宮請即教授御史王顯欲逞其奸與中常侍給事中
孫伏連等厲色不聽寢門下之奏伏連等欲矯太后
令以高肇錄尚書事顯與渤海公高猛同為侍中忠
即於殿中收顯殺之餘見通鑑先是中書尚書之權
迭為輕重至是女主臨朝則門下之權重矣是年高
陽王雍為太師錄尚書事與太傅懌等入居門下同
釐庶政熙平二年太師高陽王雍正元四年太尉汝
南王悅入居門下參決尚書奏事

北史列傳武定二
年陽休之除中書

侍郎先是中書專主綸言魏宣武
已來事移門下至是發詔依舊

又王遵業傳時政

歸門下世謂侍中黃門侍郎為小宰相皆胡后臨朝

時後世三省並稱遂為故實

癸未魏高陽王雍為太傅領太尉清河王懌為司徒驃

騎大將軍廣平王懷為司空

以魏紀修

己亥魏尊胡貴嬪為

皇太妃三月甲辰朔廢皇太后

呂祖謙標目修

魏于忠專朝政

以呂祖謙標目修

魏復百官祿罷綿麻稅

以魏紀修

夏四月梁淮堰

潰復作之

以梁紀修

秋八月乙亥魏于忠殺左僕射郭祚尚

書裴植免高陽王雍

以呂祖謙
標目修

丙子魏尊胡太妃為皇

太后以其父國珍為光祿大夫

以呂祖謙
標目修

己丑清河王

懌為太傅領太尉廣平王懷為太保領司徒任城王澄

為司空庚寅車騎大將軍于忠為尚書令特進崔志為

車騎大將軍並儀同三司壬辰員外郎元義為通直散

騎常侍

以魏
紀修

九月魏太后臨朝稱令于忠為征北大將

軍冀州刺史任城王澄領尚書令

以通
鑑修

梁將軍趙祖悅

襲據魏西碭石癸亥魏遣將軍崔亮攻之

以通
鑑修

解題曰西碛石見晉孝武太元八年解題

冬十月乙酉魏胡國珍為中書監儀同三司

以通鑑修

閏十

二月魏以高陽王雍為太師錄尚書事

以魏紀傳修

盜殺魏

晉壽太守以降梁益州刺史鄱陽王恢遣巴西梓潼太

守張齊赴之

以通鑑修

魏胡太后攝行祭事

以呂祖謙標目修

梁高祖武皇帝天監十五年魏肅宗孝明皇帝元翊熙平元年

春正月戊辰朔魏改

元

以魏紀修

魏以吏部尚書李平為鎮東大將軍行臺二月

乙丑克碛石平將攻浮山堰崔亮稱疾師還

以魏紀呂祖謙標目

修三月戊辰朔日有食之

以梁紀修

夏四月梁淮堰成

以呂祖謙

標目修

梁張齊破魏兵圍武興魏以鎮南軍司傅豎眼為

西征都督秋七月擊齊敗之復取東益州

以呂祖謙標目修

九

月梁淮堰壞

以呂祖謙標目修

魏任城王澄請重北邊鎮將選

舉不聽

以呂祖謙標目修

是歲魏作永寧寺求佛書於西域

以魏

釋老志及通鑑修

解題曰太后好事佛民多絕戶為沙門高陽王友李

瑒上言三千之罪莫大於不孝不孝之大無過於絕

祀孔子云未知生焉知死安有棄堂堂之政而從鬼
教乎都統僧暹等忿瑒謂之鬼教以為謗佛泣訴於
太后太后責之瑒曰天曰神地曰祇人曰鬼傳曰明
則有禮樂幽則有鬼神然則明者為堂堂幽者為鬼
教佛本出於人名之為鬼愚謂非謗熙平元年詔遣
沙門惠生使西域採諸經律正光三年冬還京師所
得經論一百七十部行於世神龜元年冬司空尚書
令任城王澄奏曰高祖定鼎嵩瀍城內唯擬一永寧

寺地郭內唯擬尼寺一所餘悉城郭之外景明之初
微有犯禁世宗爰發明旨城內不造立浮屠僧尼寺
舍正始三年沙門統惠深違禁前詔仍卷不行邇來
十年私營轉盛城郭之內垂五百寺奪民居三分且
一昔如來闡教多依山林今此僧徒戀著城邑當由
利引其心莫能自止非但京邑如此天下州鎮僧寺
亦然侵奪細民廣占田宅如臣愚意都城中有營造
麤功可改者請在郭外任擇所便若僧不滿五十者

小就大寺未幾喪亂加以河陰之禍朝士死者其家
多舍宅以施僧尼京邑第舍略為寺矣今不復行

水經註永寧寺作九級浮屠下基方一十四丈自金
露梓下至地四十九丈取法代都七級而又廣高之
雖西京之盛五都之富未有若斯之富楊街之洛陽
伽藍記自後漢至晉永嘉惟四十二寺後魏京城內
外一千五百六十七寺東魏
遷鄴焚毀外餘四百三十寺

柔然伏跋可汗大破高車殺其王彌俄突

以呂祖謙
標目修

梁高祖武皇帝天監十六年
魏肅宗孝明皇帝熙平二年春正月魏詔五銖錢與古

錢通行巧偽者罪之

以通鑑修魏考核軍功尋止

以通鑑修夏四

月戊申魏中書監開府胡國珍為司徒

以通鑑修

梁宗廟以

麵代牲冬十月薦脩用蔬果

以梁紀修

梁高祖武帝天監十七年魏肅宗孝明皇帝神龜元年春二月己酉魏改元

以魏紀修

解題曰宋庠紀年通譜獲神龜於九龍殿靈芝池故

改元神龜

夏四月丁酉魏秦文宣公胡國珍卒號太上秦公

以呂祖謙

標目魏復稅綿麻

以魏傳修

解題曰諫議大夫張普惠上疏以為高祖廢大斗去

長尺改重秤以愛萬姓從薄賦知軍國須綿麻之用
故絹上稅綿八兩布上稅麻十五斤萬姓歌舞以供
其賦自茲以降所稅絹布漸漸長闊百姓怨嗟宰輔
不尋其本革其弊存其可存而特放綿麻之調以悅
天下之心尚書知國少綿麻便欲去天下之大信奏
求還復以充國用不思庫中大有綿麻而羣官共竊
之何者今絹布匹有丈五之盈絲綿斤兼百銖之剩
未聞依律罪州郡或一匹之濫一斤之惡則鞭戶主

連三長百官請俸之人樂長闊厚重無復准極不聞
嫌長惡廣求計還官者今若必復綿麻宜明立嚴禁
復本幅度依太和之稅使天下知二聖之心愛民惜
法如此則高祖之軌中興於神龜矣夫高祖增綿麻
之初正以民之病於大斗長尺重秤有甚於綿麻故
也然綿麻既取之後安能保後世幅度銖合不復增
乎未幾何時浸復長闊則雖蠲綿麻已無益矣况復
從而征之乎天下之事固有以善意為之而反作俑

於後日者此類是也

魏主始月一視朝

以朱熹
綱目修

解題曰孝文臨朝堂謂穆亮曰三代之禮日出視朝
漢魏以降禮義漸殺晉令有朔望集公卿於朝堂而
論政事亦無天子親臨之文今因卿等日中之集中
前則卿等自論政事中後與卿等共議可否蓋自孝
文之後論政之禮又廢矣至是始因張普惠之言而
行之事見通鑑

五月戊寅梁司徒驃騎大將軍揚州刺史臨川王宏免

以朱熹
綱目修秋七月癸未朔魏以宦者侍中劉騰為衛將軍

儀同三司

以呂祖謙
標目修

戊申魏弒故太后高氏

以呂祖謙
標目修

冬十月乙亥梁中軍將軍中書監臨川王宏為司徒以通

鑑是歲魏復推鹽

以呂祖謙
標目修

梁高祖武皇帝天監十八年
魏肅宗孝明皇帝神龜二年春正月丁亥魏胡太后稱

詔以呂祖謙
標目修二月庚午魏羽林虎賁殺征西將軍張彝

不復窮治

以通鑑稽
古錄修

解題曰識者於是知魏之將亂也按齊書本紀高湖
子謚仕魏至侍御史坐法徙懷朔鎮生樹樹生歡累
世北邊故習其俗遂同鮮卑長而深沉有大度給鎮
為隊長使自洛陽還傾產以結客親故怪問之曰
宿將羽林相率焚領軍宅朝廷懼其亂而不問為政
若此事可知也財物豈可常保耶自是乃有澄清天
下之志餘見通鑑葉適曰高歡中國人也以徙於北
邊遂習鮮卑宇文泰鮮卑也而欲
行中國禮樂之事習相遠也豈不然又曰歡微賤給
使所往來皆胥吏下隸而史載其傾產結客不知歡

衣食尚不自給產於何傾而天下
清濁亦竟何在蓋為文飾之過耳

魏吏部尚書崔亮初立停年格選舉失人自亮始

以呂祖謙

修標目

解題曰通典亮奏為年格制官不問愚賢以停解日
月為斷雖復官須此人停日後者終不得取庸才下
品年月久者則先擢用時沉滯者皆稱其能後甄琛
元脩義城王徽相繼為吏部尚書利其便已踵而行
之自是賢愚同貫魏之失才從亮始也及辛雄為吏

部郎中上疏曰神龜以來專以停年為選士無善惡
歲久先敘職無劇易名到授官執案之吏以差次日
月為功能銓衡之人以簡得老舊為平直且庸劣之
人莫不貪鄙貨賄是求肆心縱意致徭役不均發調
違謬蓋助陛下治天下者唯在守令宜須簡置以康
國道請上等郡縣為第一清中等為第二清下等為
第三清選補之法妙盡才具如不可並後地先才不
得拘以停年竟無銓革三載黜陟有稱者補在京名

官如前代故事不歷郡縣不得為內職則人思自勉

書奏會帝崩

時亮外甥劉景安書規亮曰殷周以鄉塾貢士兩漢由州郡薦才魏晉又置中

正雖未盡美應十收六七朝廷貢士止求其文不取其理察孝廉推論章句立中正不考人才行業空辨姓氏高下至於取士之途不溥沙汰之理未精舅須改張易調如何反為停年格以限之天下誰復修勵名行哉亮答書曰古今不同時宜復異昔有中正品其才上之尚書據狀量人授職此乃與天下共爵人也今之選專歸尚書以一人之鑒照察天下何異以管窺天哉今勲人甚少又羽林入選武夫崛起而不解書計忽今佩組乘軒求其烹鮮之效文武人至多官員至少不可周溥設令十人共一官猶無官可授况一人冀一官哉吾近面執不宜使武人入選請賜其爵厚其祿既不見從是以權立此格限以停年耳

夏五月戊戌魏以任城王澄為司徒驃騎大將軍儀同

三司

以本紀修

魏賞賜無節府庫漸虛乃減百官祿力

以呂祖謙

標目修朱熹綱目修

冬十二月癸丑魏任城文宣王澄卒

以呂祖謙標目

修

梁高祖武皇帝普通元年魏肅宗孝明皇帝正光元年

春正月乙亥朔梁改元

以梁

紀修丙子日有食之

以梁紀修

秋七月丙子魏領軍將軍元乂

及劉騰幽太后於北宮殺清河王懌

以呂祖謙標目修

己卯梁

江淮海溢

以梁紀修

辛卯魏改元

以魏紀修

解題曰宋庠紀年通譜加元服故改元

魏相州刺史中山王熙起兵誅元乂劉騰不克八月見

殺

以魏紀稽古錄修

甲子梁車騎將軍永昌嚴侯韋叡卒

以呂祖謙

標目

九月戊戌魏以高陽王雍為丞相與元乂同決庶

務

以魏紀修

解題曰十月以汝南王悅為侍中太尉十二月以京

兆王繼為司徒通典曰後魏舊制有大將軍不置太

尉有丞相不置司徒自正光以後始俱置之然又重

門下官多以侍中輔政則侍中為樞密之任

柔然可汗阿那瓌奔魏

魏紀修

冬十月魏以汝南王悅為

侍中太尉十二月辛酉魏京兆王繼為司徒

魏紀修

魏聘

梁復通好

通鑑修

梁高祖武皇帝普通二年
魏肅宗孝明皇帝正光二年

春正月魏納阿那瓌于柔

然弗克

通鑑修

三月魏右將軍奚康生謀迎太后不克見

殺劉騰為司空夏四月京兆王繼為太保崔光為司徒

以呂祖謙標目修

六月梁琬琰殿火

梁紀修

秋七月梁將軍裴邃

為豫州刺史

以通鑑修

解題曰時以合肥為豫州

高車破柔然可汗婆羅門降魏冬十月魏分處阿那瓌

婆羅門於邊

以呂祖謙標目修

梁高祖武皇帝普通三年魏肅宗孝明皇帝正光三年

夏五月壬辰朔日有食之

既

以本紀修

冬十一月丙午魏初行正光

以魏紀修

十二月京

兆王繼為太傅崔光為太保

以魏紀修

柔然婆羅門叛魏亡

歸尋見擒

以呂祖謙標目修

是歲梁西豐侯正德奔魏

以通鑑修

梁高祖武帝普通四年
魏肅宗孝明皇帝正光四年
春二月柔然阿那瓌入魏

境

以本紀修

三月魏劉騰卒

以呂祖謙標目修

夏四月阿那瓌北遁

以呂祖謙標目修

魏尚書令李崇請改緣邊諸鎮為州不從

以呂

祖謙標目修

魏懷荒鎮民及沃野鎮民破六韓拔陵反改元

以呂祖謙標目修

冬十一月癸未朔日有食之

以本紀修

十二月戊

午梁始鑄鐵錢

以梁紀修

是歲梁西豐侯正德自魏逃歸復

其封爵

以列傳修

解題曰正德逃歸而復其封爵所以基他日叛逆之

禍也事見通鑑

梁高祖武皇帝普通五年
魏肅宗孝明皇帝正光五年
春三月魏遣臨淮王彧討

破六韓拔陵夏四月敕勒酋長胡琛應拔陵武川懷朔

鎮陷五月彧敗壬申以李崇開府為討北大都督討之

以呂祖謙標
目魏紀修

六月梁遣裴邃伐魏

以呂祖謙
標目修

魏秦州莫

折大提反遣雍州刺史元志討之大提死其子念生自

稱天子改元秋七月甲寅遣吏部尚書元脩義為西道

行臺討之

以呂祖謙
標目修

魏將軍崔暹敗於白道李崇還雲

中

以呂祖謙
標目修

解題曰冀州圖云雲中郡北去陰山八十里南去通
漢長城百里即白道川也當原陽鎮北

八月甲午魏元志大敗於隴口

以魏
紀修

解題曰按太平寰宇記唐元載云原州當隴山之右
武經摠要今鎮戎軍故原州城

東西部敕勒皆附破六韓拔陵丙申魏始改鎮為州

以呂

祖謙標
目修

魏秀容人反別將爾朱榮討平之

魏紀

九月梁拔

魏諸城裴邃襲壽陽弗克

以梁紀修

壬申魏以左僕射蕭寶

寅為西道行臺大都督

以魏紀修

冬十月魏營州就德興反

以呂祖謙
標目修

解題曰營州領昌黎建德遼東樂浪冀陽營兵六郡

並營州
之地

梁裴邃進兵魏守將多棄城走

以通鑑修

十一月戊申莫折

天生陷魏岐州殺元志十二月壬辰魏以京兆王繼都

督西道討之

以本紀呂祖謙
標目修

解題曰岐州治雍城鎮領秦平鳳翔府武都鳳翔府隴州武

功鳳翔府醴州之地三郡

梁取魏三關圍潁州弗克以通鑑修

解題曰郢州領安陽城陽汝南後省三郡魏地形志豫州義陽郡注

永安三年置天平四年罷隋地理志汝南郡真陽縣注後魏置郢州東魏廢州改置義陽郡

是歲梁太子詹事周捨免散騎常侍朱异代掌機密以呂

祖謙標目修

梁高祖武皇帝普通六年魏肅宗孝明皇帝孝昌元年春正月梁破魏南鄉郡及

馬園等城

以朱熹綱目修

庚申魏徐州刺史元法僧稱帝改元

魏討之法僧降梁梁以為司空

以呂祖謙標目修

魏征西將軍

西道都督崔延伯及蕭寶寅大破莫折天生於黑水走

之以京兆王繼為太尉

以魏紀修

解題曰按水經注謂水自落門東至黑水峽東有黑

水出南山北流入海

癸酉梁裴邃大敗魏河間王琛于壽陽

以梁紀修

二月魏元

又為驃騎大將軍開府尚書令

以呂祖謙標目修

三月乙丑梁

遣豫章王綜督彭城軍召元法僧還

以呂祖謙標目修

魏京兆

王繼班師

以呂祖謙標目修

柔然阿那瓌討破六韓拔陵破之

夏四月自稱可汗

以朱熹綱目呂祖謙標目修

辛卯魏胡太后臨朝

發劉騰墓賜元义死以開府屬鄭儼前鳳門太守徐紇

為中書舍人

以魏紀傳修

壬辰胡琛遣將万俟醜奴等寇魏

涇州崔延伯擊之敗死

以魏紀修

五月梁夷陵烈侯裴邃卒

壬子以中護軍夏侯亶督壽陽軍事

以呂祖謙標目修

六月庚

辰梁豫章王綜降魏魏取彭城立綜為丹陽王更名贊

梁呂夏侯亶還

以呂祖謙
標目修

癸未魏改元

以魏
紀修

西部鉄勒

降魏廣陽王深大敗破六韓拔陵

以魏
傳修

秋八月魏杜洛

周反於上谷改元

以魏
紀修

冬魏二荆西郢州蠻反梁將曹

義宗圍荊州

以呂祖謙
標目修

解題曰按水經注東荊州治泚陽縣通典後魏置東

荊州於唐州荊州於鄧州魏書列傳裴絢為郢州刺

史以蠻酋地居險要表為西郢州刺史後周紀改西

郢州為鴻州

屬唐
州

十二月戊子梁邵陵王綸有罪免官削爵土

以朱熹標目修

魏

山胡劉蠡升自稱天子改元

以呂祖謙標目修

解題曰按通典稽胡一曰步落稽晉時匈奴別種或

云赤狄之後自離石

昌化郡

以西安定以東方七八百

里居山谷間蠡升居雲陽谷

在縣界

梁高祖武皇帝普通七年魏肅宗孝明皇帝孝昌二年春正月魏鮮于脩禮反於

定州

以呂祖謙標目修

夏四月魏鮮于阿胡反於朔州遣左光

祿大夫長孫稚為都督討之鮮于脩禮敗稚五月以吏

部尚書廣陽王淵為北討大都督

以魏紀修

解題曰懷荒民叛而沃野應之高平民叛而秦州應之秀容民叛而和龍上谷定朔諸州相延而動卒使爾朱得之以為資其所由來者漸矣按地形志朔州領大安廣寧神武太平附化五郡後並省隋地理志代公猗盧都代即朔州後魏為懷朔鎮孝文於州北定襄故城置朔州齊天保六年於州西南四十七里置朔州八年移於馬邑城即今城也廣陽王淵北史

避唐高祖諱改作深按魏收書作淵而通鑑從北史
今改從收書

秋七月魏行臺常景破杜洛周別帥以通鑑修戊申鮮于阿

胡陷魏平城以呂祖謙標目修梁遣潁州刺史元樹及夏侯亶

伐魏以本紀修八月癸巳賊帥元洪業殺鮮于脩禮以降魏

賊黨葛榮殺洪業而自立以呂祖謙標目修魏恒朔州都督爾

朱榮襲取肆州以呂祖謙標目修九月辛亥葛榮殺魏都督章

武王融自稱天子國號齊改元又殺廣陽王淵以呂祖謙標目

修就德興陷魏平州

以通鑑修

莫折念生降魏既而復反破

六韓拔陵殺胡琛万俟醜奴併其衆

以呂祖謙標目修

冬十一

月辛巳魏壽陽降梁梁以夏侯亶為豫南豫二州刺史

以通鑑修

解題曰按輿地志梁克壽春立淮南梁西汝陰武安

四郡通典自齊永元陷後魏至是二十七年始復胡

寅曰梁武三築淮堰至是十年死者數十萬人然後

能取壽陽才得七萬五千口是十年勞費以三四人

而易一人其愚甚矣事見通鑑

杜洛周陷魏幽州執常景

以魏紀修

魏豫徵六年租調

以呂祖謙

標目
修

解題曰王師古曰魏自北方諸鎮選舉既輕守令率以暴賦橫斂為先故其亂相尋而不息魏之君臣不深推其本而欲恃力以求勝連歲征討國用耗竭於是豫斂六年租調以給征討之費甚至入市有稅邸店有征既以重斂失六鎮之心又恣虐取以重中土

之怨是以手足之疾而使心腹俱受其毒其亡不亦

宜乎事見通鑑

梁高祖武皇帝大通元年

魏肅宗孝明皇帝孝昌三年春正月乙丑梁徐勉為尚

書僕射

以梁紀修

辛未魏葛榮陷殷州

以本紀修

解題曰殷州統趙

宋屬慶源真定中山三府

南趙

信德慶源二府

南鉅鹿

慶源大名二府三郡

莫折念生大敗魏司空蕭寶寅於涇州遂陷岐幽北華

州寶寅免為庶人

以本紀修

解題曰幽州領西北地

宋屬慶陽府原環二州

趙興寧州襄樂慶陽

延安二府寧州

三郡方輿記大統十四年分涇州新平縣置

南幽州廢帝三年去南為幽州北華州領中部

延安府鹿州

坊二州敷城

延安府鹿州

二郡通典魏置東秦州於鹿州後

改北華州餘見升平元年解題

辛卯梁譙州刺史湛僧智圍魏東豫州司州刺史夏侯

夔取魏平靜穆陵陰山關

以通鑑修

解題曰按地形志東豫州治廣陵即新蔡郡長陵縣

領汝南

蔡州

東新蔡

光蔡州

新蔡

蔡州

弋陽

光州

長陵

蔡州

陽安

未詳六郡隋書地理志蔡州新息後魏置東豫州又魏

書曹世表傳世表行豫州刺史值蕭衍將湛僧瑤

即僧

智陷東豫州州民劉獲鄭辯反於州界朝廷以源子

恭代世表為東南道行臺率元顯伯等討之時賊衆

強斷小殷關

潁昌府郟城縣北有小殷水

諸將咸欲保城自固世

表時患背腫輿病呼統軍是云寶謂曰僧瑤所以敢

深入為寇者以辯獲皆州民之望為之內應譯知劉

獲移軍欲迎僧瑤去此八十里今出不意一戰可破

獲破則僧瑤自走乃簡士馬付寶暮出城比曉兵合

一戰破獲僧瑤退走元慶和傳慶和東豫州刺史為

梁將所攻舉城降之梁書夏侯夔傳夔司州刺史譙

州刺史湛僧智圍魏東豫州刺史元慶和於廣陵入

其郛魏書地形志東豫州太和置治廣陵城興和分

置豫州廣陵郡領宋安光城安璧新蔡汝南五縣後省通鑑考異知其非南兗

州之廣陵但不明載其處耳 顯伯率軍赴援夔自

武陽魏書地理志蔡州襄城郡有武陽縣隋會僧智

斷魏軍歸路夔至遂請降顯伯夜遁衆軍追斬獲不

可勝數詔以僧智領東豫鎮廣陵夔引軍屯安陽

魏書

地形志汝南郡有安陽縣隋地理志光州固始縣有安陽郡

遣偏將屠楚城由是

義陽北道遂與魏絕餘見通鑑穆陵陰山關在黃州
麻城縣餘見天監三年三關解題

二月莫折念生據魏潼關既而西走

以魏紀修

三月辛未梁

主沒身同泰寺

以皇極經世修

解題曰南朝宮苑記同泰寺武帝造在玄武門內逼

路東寺南門直對宮城大通門

甲戌梁改元

以梁紀修

解題曰宋庠紀年通譜梁創同泰寺開大通門對之取反語以協同泰也改元符寺及門名也

秋七月魏相州刺史樂安王鑒降葛榮魏討之八月丁

未伏誅

以魏紀修

九月魏秦州杜祭殺莫折念生據其州

以魏紀修

紀修魏將軍元顯伯救東豫州冬十月庚戌東豫州降梁

顯伯敗走

以通鑑修

魏以衛將軍討虜大都督爾朱榮為車

騎將軍儀同三司

以本紀修

梁東宮直閣陳慶之取魏渦陽

大敗魏兵

以通鑑修

魏以中尉酈道元為關右大使甲寅征

西將軍雍州刺史開府西討大都督蕭寶寅殺之而反

自稱齊帝改元魏遣尚書僕射長孫稚為行臺討之

以魏

紀修

十一月丁卯梁以護軍蕭淵藻為都督鎮渦陽

以梁紀修

葛榮陷魏冀州十二月戊申殺刺史源子邕

以魏紀修

秦州

殺杜粲以降魏

以魏紀修

大事記續編卷四十一